

Бокс бўйича Баҳодир Жалолов мактаби очилди

Президент Шавкат Мирзиёев 5 март куни Тошкент шаҳрида барпо этилган Баҳодир Жалолов ихтисослаштирилган бокс спорт мактабини бориб кўрди.

Олимпиада ва Осиё ўйинлари ғолиби, икки карра жаҳон ва уч карра Осиё чемпиони Баҳодир Жалолов Ўзбекистон спортининг байроқдори ҳисобланади. У кейинги йилларда профессионал боксда ҳам муваффақиятли қатнашиб келмоқда.

Ортимизда бундай чемпионлар фаолиятини тарғиб қилиш, уларнинг намунасида ёш спортчиларни тарбиялашга алоҳида аҳамият қаратилмоқда. Давлатимиз раҳбарининг 2022 йил 14 мартдаги қарорига мувофиқ, шундай яна бир маскан – Бокс бўйича Баҳодир Жалолов спорт маҳорати мактаби ташкил этилди.

Бу ерда халқаро даражадаги боксчиларни тайёрлаш, бунинг учун юқори малакали мураббий ва мутахассисларни жалб этиш, ўқув-машғулотларни халқаро стандартлар даражасида ташкил қилиш ҳамда илғор тажрибалар асосида унинг сифатини ошириб бориш йўлга қўйилмоқда.

Тўрт қаватли замонавий бинода бунинг учун барча шароит яратилган. Биринчи қаватда асосий спорт зали, сузиш ҳавзаси, тиббиёт хонаси ва ошхона бор. Иккинчи қаватда психология, хорижий тиллар, назарий машғулотлар, информатика ва ўқитувчилар хоналари, шунингдек, 45 ўринли меҳмонхона жойлашган. Учинчи ва тўртинчи қаватларда 235 ўринли ётоқхона, маънавият хонаси ташкил этилган. Шунингдек, бино ертўласида автотураргоҳ қурилган.

Бокс мактаби 175 ўринга мўлжалланган бўлиб, 5-11-синфларга ҳар йили 25 нафардан ўқувчи саралаб олинади. Илк иқтидорлар 2022 йилги ўқув йилида қабул қилинган ва бугунги кунда 50 нафар ўқувчи сабоқ олмоқда. Улар бутун мамлакатимиздан келган талабгорлар орасидан саралаб олинган.

Баҳодир Жалолов мактаби ўқувчилари 2023 йилда халқаро ва республика мусобақаларида 26 та олтин, 18 та кумуш, 15 та бронза медални қўлга киритган. Бу йил ҳам қатор турнирларда иштирок этиш режалаштирилган.

Мактаб бутун мамлакатимиз ёш боксчилари учун ўқув-машғулот базаси бўлади. Ёш истиқболли боксчиларни танлаш ва тарбиялаш бўйича бошқа спорт мактаблари ва марказлари билан ҳамкорлик қилиб боради.

Шу боис мактабда ёш спортчилар, соҳа мутасаддилари билан мулоқот бўлди. Мулоқотга видеоалоқа орқали худудлар ҳам уланди.

– Биз бу йилни Ёшлар ва бизнесни қўллаб-қувватлаш йили, деб эълон қилдик. Ҳар доим ҳам бу масалага алоҳида эътибор қаратиб, ёшларга керакли шароитларни яратаямиз. Уларнинг салоҳияти, интилиши кучли. Бокс бўйича дунёда етакчилар қаторидамиз. Бу салоҳиятни, иқтидорли ёшларимизни ривожлантириш мақсадида шу мактабни ташкил этдик. Энди Баҳодир Жалолов мактаби ўз йўналишида худди Президент мактабидек намунавий тизим бўлади. Бокс методологияси, диетологияси, тиббиёти, психологияси худудлардаги спорт мактабларида ҳам ривожлантирилади, – деди Шавкат Мирзиёев.

Вилоят ҳокимларига спорт федерациялари билан ҳамкорликни яхшилаш, худудларда уларнинг ишига қўмаклашиш бўйича кўрсатмалар берилди. Ёшлар ўртасида спортни янада оммалаштириш, хусусан, уларни боксга жалб этиш, бунинг учун мактаб ва тўғрақларда шароитларни кенгайтириш зарурлиги таъкидланди.

Оксана Чусовитина издошлари учун замонавий мактаб

Спорт гимнастикаси бўйича уч карра жаҳон чемпиони, жаҳон кубоги соҳиби Оксана Чусовитина – мамлакатимиз фахри. У саккизта Олимпиадада қатнашган ягона гимнастикачи сифатида Гиннесснинг рекордлар китобига киритилган.

Ортимизда шундай спортчининг бўлиши болалар учун намуна, далда. Президентимизнинг 2022 йил 14 мартдаги Оксана Чусовитина ихтисослаштирилган гимнастика спорт мактабини ташкил этиш тўғрисидаги қарори спортсевар ёшларга катта шароит яратди.

Давлатимиз раҳбари 5 март куни ушбу спорт мактабига ташриф буюриб, бу ердаги шароитларни ва машғулотларни кўздан кечирди.

Муассаса миллий терма жамоалар учун халқаро даражадаги спортчиларни тайёрлаш, юқори малакали мураббий ва мутахассисларни жалб этиб, ўқув-машғулот жараёнини халқаро стандартлар даражасида ташкил қилиш, мураббийлар ва гимнастикачилар маҳоратини мунтазам ошириб боришга йўналтирилган. Бунинг учун уч қаватли замонавий бинода барча шароит яратилган.

Биринчи қаватда асосий зал ва машғулотлар зали, тренажёр майдончаси, тиббиёт хонаси ва ошхона жойлашган. Теза қаватлардан 165 ўринли ётоқхона, меҳмонхона, информатика ва маънавият хоналари ўрин олган. Мактаб Германиядан келтирилган спорт анжонлари ва жиҳозлари билан таъминланган.

Гимнастика мактаби 5-11-синфлардаги 105 нафар ўқувчига мўлжалланган. Бугунги кунда 91 нафар ўғил-қиз маҳоратини оширмоқда. Уларга иккита хорижий тил ҳам ўргатилади.

Чусовитина издошлари ўтган йили спорт гимнастикаси ва бадий гимнастика бўйича халқаро мусобақаларда 4 та, республика турнирларида 6 та ва спорт мактаблари ўртасида 24 та медални қўлга киритган.

Муҳими шундаки, гимнастикачи ёшлар бир жойнинг ўзиде яшаб, таълим олиб, машғулотлар ўтказиши. Умуман олганда, бу спорт мактаби гимнастикачилар учун республикада ягона ўқув-машғулот базасига айланади.

Шу ерда спорт соҳаси мутасаддилари ҳамда видеоалоқа орқали худудлар раҳбарлари иштирокида мулоқот бўлди.

– Нима учун биз бу йўналишга катта эътибор бериб, мактаблар яратаямиз? Гимнастика – ҳамма спорт турларининг асоси. Футболчи ҳам, боксчи ҳам, соғлом бўламан деган инсон ҳам гимнастика қилиши керак. Иқтисодий ривожлантириш, ёшларга таълим бериш билан бирга уларни спорт билан шуғуллантирилсак, юртимизда соғлом зурриё, соғлом миллат бўлади, – деди Президент.

Шу мақсадда гимнастикани болалар боғчаларидан кенг жорий қилиш, қобилиятли спортчиларни саралашни шу боқичдан бошлаш, ҳар бир худудда иккитадан гимнастика мактаби ташкил этиш масалалари муҳокама қилинди.

Жорий йил Францияда бўладиган Олимпия ўйинларида қатнашадиган спортчи ва уларнинг мураббийларига алоҳида шароит яратиш, муносиб тайёргарлик кўришини таъминлаш бўйича мутасаддиларга кўрсатмалар берилди.



Давлат дастури ижроси:

4 мингдан ортиқ хотин-қиз уй-жой билан таъминланган

Олий Мажлис Қонунчилик палатасининг мажлисида "Инсонга эътибор ва сифатли таълим йили" давлат дастури ҳамда "Ўзбекистон – 2030" стратегиясининг 2023 йилда бажарилиши юзасидан Вазиirlар Мақкамасининг ҳисоботи атрофида муҳокама қилинди.

Ҳисоботда келтирилганидек, 2023 йилда ялпи ички маҳсулотнинг ўсиши ўтган йилнинг мос даврига нисбатан 6 фоизни ташкил қилган. Ҳар бир инсонга ўз салоҳиятини рўёбга чиқариши учун муносиб шароитларни яратиш йўналишида ҳам қатор ишлар амалга оширилган. Яъни, мактабгача таълим билан қамров даражасини ошириш йўналишида 3-7 ёшли 2,1 миллион бола сифатли мактабгача таълим билан қамраб олинган. Янги мактабларни қуриш ва мавжудларини реконструкция қилиш ҳамда уларда зарур шарт-шароитларни яратиш мақсадида 563 та мактабда қурилиш ишлари якунланган, 46 та спорт зали бинолари қурилган. Шунингдек, республика бўйича қуввати 116 минг нафар ўринга мўлжалланган 4 минг 402 та оилавий нодавлат мактабгача таълим ташкилотлари ташкил этилган.

Аҳоли бандлигини таъминлаш, ёшлар ва хотин-қизларни қўллаб-қувватлаш, уларни тадбиркорликка кенг жалб этиш йўналишида кенг қўламли ишлар амалга оширилган. Жумладан, "Аёллар дафтари"га киритилган 1 млн. 779 нафар эҳтиёжманд хотин-қизларнинг 993 минг 368 нафарига ёрдам кўрсатилган. Шу билан бирга, "Ёшлар дафтари"га жами 435 минг 316 нафар ёш киритилиб, уларнинг 388 минг 70 нафарига контракт тўлови, меҳнат қуроллари учун маблағ, мuddатли ҳарбий хизмат бадали, ҳайдовчилик курслари, касб-хунарга ўқиш ва даволаниш каби йўналишлардаги харажатлар учун 444 млрд. сўм қоплаб берилган. Хусусан, банд бўлмаган 17,5 минг нафар ёш илм-фан, замонавий касблар ва ҳайдовчиликка ўқитилган. 31,5 минг нафар ногиронлиги бўлган ва бемор ёшларга даволаниш харажат-

лари тўлаб берилган, ишсиз бўлган 18,5 минг нафар ёшга 60 млрд. сўмлик меҳнат қуроллари ажратилиб, маҳалланинг ўзиде бандлиги таъминланган.

Бундан ташқари, республика бўйича оғир ижтимоий аҳволга тушиб қолган турар жойга муҳтож жами 4 минг 138 нафар хотин-қиз уй-жой билан таъминланиб, 3 минг 488 нафар эҳтиёжманд хотин-қиз махсус жарроҳлик амалиётидан ўтказилган.

Худудларнинг саноат салоҳиятини тўлиқ ишга солиш мақсадида хизматлар соҳасини ривожлантириш учун 15 минг 171 та савдо сервис объекти ташкил этилиб, 96 минг 115 та иш ўрни яратилган.

Ҳисоботда келтирилишича, "Яшил энергия" технологияларини кенг жорий қилиш доирасида насос станцияларининг электр энергияси истеъмолини камайтириш мақсади йўналишида 177 та насос ҳамда 237 та электродвигателлар янгисига алмаштирилган. Экологик вазиятни барқарорлаштириш ҳамда "Яшил макон" умуммиллий лойиҳасини кенгайтириш йўналишида республика бўйлаб жами 219,1 млн. туп, шундан баҳор мавсумида 127,7 млн. туп, куз мавсумида 91,4 млн. туп манзарали ва мевали дарахт, бута қўчатлари экилган.

Муҳокамаларда депутатлар Давлат дастури доирасида аҳоли ўртасида ишсизликни камайтириш, даромадларни ошириш, фан ва узлуксиз таълимни ривожлантириш, хотин-қизлар, ёшларни ижтимоий қўллаб-қувватлашни кучайтириш, ҳар бир инсонга ўз салоҳиятини рўёбга чиқариши учун муносиб шароитларни яратиш, одамларнинг турмуш шароитларини яхшилашга қаратилган ишлар амалга оширилганини юқори баҳолади.

Муҳтарам КОМИЛОВА,
ЎЗА.



АЁЛ УЧУН ИМКОНИЯТ
ЭШИКЛАРИ ОЧИҚ

БАҲОР, МЕҲР ВА ТАБИАТ
ҲАҚИДА ЎЙЛАР



Ўзбекистон Республикаси Президентининг
ҚАРОРИЗУЛФИЯ НОМИДАГИ ДАВЛАТ МУКОФОТИ БИЛАН ТАҚДИРЛАШ
ТЎҒРИСИДА

Мамлакатимизда хотин-қизларни эъзозлаш, уларнинг эзгу орзу-интилишларини қўллаб-қувватлаш ҳамда ўзининг иқтидори, муҳим гою ва ташаббуслари, ибратли амалий ишлари ва эришган ютуқлари билан ёшларга ўрнак бўлиб келаётган, ижтимоий-иқтисодий ҳаётимиздаги ўзгаришлар жараёнида фаол иштирок этиб, Ватанимиз равнақи йўлида бор куч-ғайрати, замонавий билим ва малакаси, маънавий-интеллектуал салоҳиятини намоён этаётган қизларимизни муносиб рағбатлантириш мақсадида:

1. Оила ва хотин-қизлар қўмитаси ҳузуридаги Зулфия номидаги Давлат мукофоти

комиссиясининг Қорақалпоғистон Республикаси, вилоятлар ва Тошкент шаҳрининг иқтидорли қизларини аъло хулқи, ноёб истеъдоди, зукколиги, ташаббускорлиги, ўқишдаги муваффақиятлари ҳамда таълим, фан, адабиёт, санъат, маданият, спорт соҳаларида ва жамоатчилик фаолиятида эришган алоҳида ютуқлари учун Зулфия номидаги Давлат мукофоти билан тақдирлаш тўғрисидаги таклифлари иловадаги рўйхатга мувофиқ маъқуллансин.

2. Зулфия номидаги Давлат мукофоти билан тақдирланганларга 8 март – Халқаро хотин-қизлар куни муносабати билан ўтказиладиган

байрам тантаналарида совриндорлик дипломлари ва кўкрак нишонлари топширилсин.

3. Ўзбекистон Республикаси Иқтисодиёт ва молия вазирлиги Зулфия номидаги Давлат мукофоти совриндорларининг ҳар бирига базавий ҳисоблаш миқдорининг 50 баравари миқдорда пул мукофоти берилишини таъминласин.

4. Ўзбекистон Республикаси Президентининг Администрацияси ҳузуридаги Ахборот ва оммавий коммуникациялар агентлиги, Ўзбекистон Миллий ахборот агентлиги, Ўзбекистон Миллий телерадиокомпанияси ва бошқа оммавий ахборот воситаларига Зулфия

номидаги Давлат мукофоти соҳибаларининг ибратли фаолияти, уларнинг ноёб истеъдоди ва эришган ютуқларини кенг ёритиб бориш тавсия этилсин.

5. Мазкур қарорнинг бажарилишини назорат қилиш Ўзбекистон Республикасининг Бош вазири А.Арипов ва Ўзбекистон Республикаси Президенти маслаҳатчиси Ғ.Мирзаев зиммасига юклансин.

Ўзбекистон Республикаси
Президенти Ш.МИРЗИЁЕВ

Тошкент шаҳри,
2024 йил 4 март

Ўзбекистон Республикаси Президентининг 2024 йил
4 мартдаги ПҚ-111-сон қарорига илова

Зулфия номидаги Давлат мукофоти билан тақдирланганлар
РЎЙХАТИ

Худайбергенова Гулшанар Жангабаевна – Қорақалпоғистон Республикаси Нукус шаҳридаги 1-болалар мусиқа ва санъат мактабининг бахшичилик синфи ўқитувчиси

Коканова Нурсулиу Женисбай қизи – Қорақалпоқ давлат университетининг чет тиллари факультети филология йўналиши 4-босқич талабаси

Сулэйманова Ўғилхон Абдуразок қизи – Ўзбек миллий мақом санъати марказининг Андижон вилояти бўлими артист-мақомчиси

Жонибекова Хусниёбону Эргашвой қизи – Андижон вилояти Хўжабод тумани «Гара гури» маҳалла фуқаролар йўғинидаги ёшлар етакчиси

Пулатова Моҳичехра Темировна – Бухоро давлат университетининг қиёсий адабиётшунослик, чоғиштирма тилшунослик ва таржимашунослик ихтисослиги бўйича таянч докторанти

Тўхтамишова Гулнора Мэлс қизи – Бухоро вилояти Ромитан туманидаги 2-касб-хунар мактабининг информатика фани ўқитувчиси

Чилмурзаева Мафтун Абдуманнон қизи – Ўзбекистон Миллий университетининг қиёсий адабиётшунослик, чоғиштирма тилшунослик ва таржимашунослик ихтисослиги бўйича мустақил тадқиқотчиси (Жиззах вилояти)

Ҳожибоқиева Нигинахон Ўткир қизи – Ўзбекистон Миллий университетининг Жиззах филиали психология факультети иқтисодиёт йўналиши 3-босқич талабаси

Ҳакимова Шаҳзода Бахриддин қизи – Тошкент тиббиёт академиясининг даволаш факультети 1-босқич талабаси (Қашқадарё вилояти)

Мирзаёрова Севара Убайдуллаевна – Қарши муҳандислик-иқтисодиёт институтининг саноат иссиқлик энергетикаси ихтисослиги бўйича таянч докторанти

Эшпўлатова Моҳира Ўткиржон қизи – Тошкент шаҳри Шайхонтохур туманидаги 34-умумий ўрта таълим мактабининг ўзбек тили ва адабиёти фани ўқитувчиси (Навоий вилояти)

Омонбоева Меруерт Эркин қизи – Навоий вилояти Нурота туманидаги «Қосимқажо-Меруерт» масъулияти чекланган жамияти директори

Ҳакимова Дилшода Ойбек қизи – Ўзбекистон давлат жаҳон тиллари университетининг инглиз филологияси факультети 4-босқич талабаси (Наманган вилояти)

Аҳмаджонова Мухайёжон Акрамжон қизи – Тошкент тиббиёт академиясининг даволаш факультети 6-босқич талабаси (Наманган вилояти)

Савадян Вилана Арсеновна – Самарқанд вилояти Самарқанд шаҳридаги 51-ихтисослаштирилган умумий ўрта таълим мактабининг 10-синф ўқувчиси, бадиий гимнастика бўйича Ўзбекистон миллий терма жамоаси аъзоси

Юнусова Наргиза Тўйчимурод қизи – Самарқанд вилояти Тайлоқ тумани «Қўшчинор» газетаси муҳбири

Акрамова Сарвиноз Абдувоҳид қизи – Тошкент давлат шарқшунослик университетининг шарқ филологияси ва таржимашунослик факультети 3-босқич талабаси (Сирдарё вилояти)

Ирисқулова Камола Нормат қизи – Тошкент давлат транспорт университетининг автомобиль йўлларини лойиҳалаш ва қуриш мутахассислиги бўйича 1-босқич магистранти (Сирдарё вилояти)

Эргашова Садоқат Эшмамат қизи – Тошкент давлат ўзбек тили ва адабиёти университетининг ўзбек адабиёти ихтисослиги бўйича таянч докторанти (Сурхондарё вилояти)

Суюнова Шамсиқамар Искандаровна – Рўзи Чориев номидаги Сурхондарё вилояти ихтисослаштирилган санъат мактаб-интернатининг 11-синф ўқувчиси

Турсунбоева Фотима Ботир қизи – Алишер Навоий номидаги Ўзбекистон давлат академик катта театри опера ижроچиси (Тошкент вилояти)

Ҳакназарова Умида Урал қизи – Тошкент давлат аграр университетининг ипакчилик мутахассислиги бўйича 2-босқич магистранти

Абдусатторова Зиёдахон Дилшоджон қизи – Фарғона вилояти яккақураш спорт турларига ихтисослаштирилган спорт мактабининг камондан отиш бўйича спортчиси

Йўлдашева Мухайёжон Алишер қизи – Фарғона политехника институтининг қурилиш факультети 4-босқич талабаси

Шомуротова Зулфия Акмалжон қизи – Хоразм вилояти Хива шаҳридаги Президент мактабининг 11-синф ўқувчиси

Сапаева Рисолат Рустам қизи – Ўзбекистон давлат хореография академиясининг Урганч филиали хореография факультети 2-босқич талабаси

Тошева Маржана Рустам қизи – Юнус Ражабий номидаги Ўзбек миллий мусиқа санъати институтининг вокал ва чолғу ижрочилиги педагогларини тайёрлаш кафедраси ўқитувчиси

Трашкова Елизавета Дмитриевна – Ўзбекистон давлат хореография академиясининг хореография санъати факультети 1-босқич талабаси

ҲАЁТДАН МАМНУН
КЎНГИЛЛАР ИЗҲОРИ

Бахт ҳақида гап кетганда, ҳар ким ҳар хил фикр билдиради. Чунки бу тушунчанинг аниқ мезони йўқ. Ким учундир бахт тўқин-сочин яшаш бўлса, яна кимгадир фарзанд кўриш ёки орзусидаги автомобилга эга бўлиш бахт. Яъни, одамлар ниятига, орзусига эришса, ўшани бахт, деб ҳис қилади.

Лекин доимий иш жойига, оиласини таъминлаш учун даромад манбаига ва албатта бошпанга эга бўлиш саодатини ҳеч нарса билан қиёслаб бўлмайди. Чунки бахтнинг манзили бўлади, у қўним топадиган ошён керак. Инсоннинг уйи эса ана шуларнинг барчасини бир нуқтага бирлаштирадиган гўшадир.

Бугун ўзининг ана шундай кичик ватанига эга бўлган опа-сингилларимизнинг баъзилари билан сизларни таништирамиз. Бир-бирига мутлақо бегона бўлса-да, улардаги шукроналик, ҳаётга муҳаббат, Яратган берган неъматларни қадрлаш каби муштарак хислатлар бирлаштиради.



Азиза ГЕРАШЕНКО,
Бухоро давлат университети
талабаси:

— Айни пайтда Бухоро давлат университетининг психология йўналишининг биринчи босқич талабасиман. Давлат гранти асосида ўқишга кирдим. Бу ўтган йилги энг қувончли ва унутилмас воқеа эди. Бу йил ҳам ана шундай қутилмаган, лекин ҳамма орзу қиладиган совға билан бошланди. Январ ойида давлатимиз томонидан уй берилди. Аввалроқ бувим керакли ҳужжатларни тайёрлаб, мутасадди идорага топширган эди. Орадан ҳеч қанча вақт ўтмасдан, уй берилиши ҳақида хабар келди. Бу ҳақида бувим менга айтганларида дугонанинг ёнида эдим. Уйга қандай қанот қоққандек келганимни билмайман. Ўша

воқеанинг эртасигаёқ янги, замонавий усулда қурилган, кенг ва шинам хоналарга эга, янги таъмирдан чиққан ва барча жиҳозларига эга бўлган уйнинг калитини топширишганида, тўғриси, кўзларимга ишонмадим.

Одамлар йиллар давомида йғиб-тегриб, тежамкорлик билан харажат қилиб, уй олади. Бу осон эмас. Лекин бу уйнинг берилиши биз каби ота-она қарамогидан маҳрум бўлган болаларга, айниқса, қиз болаларга қаратилаётган эътибор намунаси, деб биламан. Ушбу эзгу ишга бош қўшганларнинг барчасига раҳмат айтаман.

Ўзим ҳақимда гапирсам, оилада бир қиз, 2 ўғилмиз. Бир акам ва 10 ёшли укам бор. 4 ойлигимдан бувим мени ўз тарбиясига олган. Балким шундан бир бувимга меҳрим бошқача. Ота-онамизни кетма-кет йўқотдик. Иккиси ҳам хасталик сабаб ҳаётдан кўз юмди. Бувим ва холам бизни ўз қарамогига олган. Уларнинг меҳри ва ғамхўрлиги сабаб бу ғамни енгилашга эришдик, деб ўйлайман.

Орзуларим улкан. Ҳамма қиз сингари оила қуриш, тил ўрганишни ва ўз соҳамнинг мутахассиси бўлишни истайман. Ўз ватанимни севаман. Лекин келажакда хорижда ўқиш ва малака ошириш ниятим ҳам йўқ эмас. Талаба бўлганимда ҳам, уй беришганида ҳам онам хаёлимга келди. У ҳаммадан ҳам кўп истарди менинг мустақил бўлишимни, ўқишим ва ўз уйимга эга бўлишимни. Онамнинг орзуси ушалди ва самолардан мени кузатиб турганига ишонаман.



Севинч ЭРГАШАЛИЕВА,
ТДЮУ талабаси:

— Мактабининг 9-синфида ўқиб юрган пайтимда ички ишлар ходими бўлишга қизиқишим ошди. 2 йил шу йўналишда таҳсил олдим. У ерни битиргач, ички ишлар академиясига имтиҳон топширдим. Бир сантиметр баландроқ бўлганимда балким ҳозир курсантликка эришардим. Лекин бўйим бироз пастлик қилиб, Фарғонадаги университетга ўқишга кирдим. У ерда бир йил ўқиб, уйдагиларни соғиндим. Шунда Тошкентга қайта ўқишга ҳужжат топширдим ва ҳозирда Тошкент давлат юридик университетининг биринчи босқичида ўқийман.

Менга айтишлари бўйича 10 ойлик чақалоқлик пайтимда ота-онам хасталик сабабли ҳаётдан кўз юмган экан. Уларнинг қанақа эканини билмайман, лекин ҳар қандай ота-она тирик бўлганида ҳам бувим билан бобомчалик меҳр берган бўларди, менимча. Улар мени ҳеч кимдан кам қилмасдан, ҳеч нарсага зориқтирмасдан вояга етказди.

Уй олишим ҳам қутилмаганда рўй берди. Ўқишда эдим. Ноябрь ойларида ҳоқимиятдагилар кўнғироқ қилди ва менга уй берилишини, шунинг учун Сирдарёга боришим кераклигини айтишди. Бу жуда ҳам ажойиб туйғу. Барча қулайликларга эга замонавий хонадон учун давлатимиздан миннатдорман.



Мадина АТАЕВА,
Қозон (Волгабўйи) федерал университети
Елабуга институтининг Фарғона филиали
талабаси:

— Оилада 4 фарзанднинг учинчисиман. Мактабни қизил аттестат билан битирганман ва ҳозирда университетнинг 3-босқичидаман. 3+1 дастури асосида рус тили ва филологияси йўналишида ўқийман. 4-босқични Қозон шаҳрида давом эттирамиз.

Бўш вақтимда турли пишириқлар тайёрлашни, китоб ўқишни яхши кўраман. Айниқса, рус ва ўзбек адабиёти, тарихга қизиқишим балинд. Спорт билан шуғулланаман, спорт залга қатнайман. Булардан ортганимда жиянларим билан вақт ўтказишдан роҳатланаман.

2012 йилда онам ҳаётдан кўз юмгач, 2014 йилда дадам Россия давлатига ишлаш учун кетиб, ўша ерда оламдан ўтди. Шундан сўнг бир муддат болалар уйда яшадим. Ота-онамдан айрилганимизда 9 ёшда бўлганман. Бу оғир жудалик мени бир зумда улғайтириб қўйди. Ҳаётда ҳамма нарса бўлиши мумкинлигини кичик ёшдаёқ англадим ва бирор воқеадан у қадар таъсирланмайдиган бўлдим. 2018 йилда катта опам турмушга чиққач, мени васийликка олди ва кичик укам билан бирга унинг уйда яшай бошладик. Давлатимиз томонидан уй берилгач, ўша ерда яшаяпман. Лекин опамнинг уйда кўпроқ вақт ўтказаман. Вояга етганимда бир марта қаттиқ хафа бўлиб йиғлаганман. Яъни, иқтисодиёт йўналишига ўқишга топширганимда 1,5 балл етмай қолиб, қира олмаганман. Кейин ҳозирги ўқиётган йўналишим очилиб, бу ерда талаба бўлиш бахтига эришдим.

Уй берилгандаги қувонч таърифлаб бера олмайман. Чунки ўз уйига, бошпанасига эга бўлиш ҳар бир инсоннинг орзуси. Кимлардир бир умр бу орзуга эриша олмай ҳаётдан ўтиб кетиши мумкин. Бир кам дунё, дейишади. Ота-онамдан эрта айрилдим, лекин давлатимиз бошимни силади, яхши инсонлар ёлғизлатиб қўймади. Буни асло ёдимдан чиқармайман.

Зилола УБАЙДУЛЛАЕВА,
“Ўзбекистон овози” муҳбири.



ЖАСОРАТЛИ МЕҲНАТГА ҲАР КУНИ ТАЙЁР БЎЛИШИМИЗ ЗАРУР

ЯҚИН ЎТМИШГА БОҚСАК, ҲАЁТИМИЗ ҚАНЧАЛИК ЎЗГАРГАНИНИ КЎРАМИЗ. ДАВЛАТ РАҲБАРИ МУНТАЗАМ ҲУДУДЛАРГА ТАШРИФ БУЮРАДИ, АҲОЛИ, ТУРЛИ СОҲА ВАКИЛЛАРИ БИЛАН МУЛОҚОТДА БЎЛИБ, АНИҚ ВА ҚАТЪИЙ ВАЗИФАЛАРНИ БЕЛГИЛАЙДИ, МУТАСАДДИЛАРДАН ТОПШИРИҚЛАР ИЖРОСИНИ СЎРАЙДИ. ҲАР БИР ҲУДУДНИНГ ЎЗИГА ХОСЛИГИ, ЮТУҚЛАРИ БИЛАН ТАНИШИЛАДИ, МУАММОЛАР ОЧИҚ-ОЙДИН ТАҲЛИЛ ҚИЛИНАДИ.

БАҲОР АРАФАСИДА, 29 ФЕВРАЛЬ ВА 1 МАРТ КУНЛАРИ ҚОРАҚАЛПОҒИСТОН РЕСПУБЛИКАСИ АМУДАРЁ ТУМАНИ ВА ХОРАЗМ ВИЛОЯТИГА ТАШРИФ ҲАМ СЕРМАҲСУЛЛИГИ БИЛАН ҲАММАНИ ҚУВОНТИРДИ. ЎЗБЕКИСТОН ХАЛҚ ДЕМОКРАТИК ПАРТИЯСИ ФАОЛЛАРИ, ДЕПУТАТЛАРИ ШУ ҲАҚДА, РЕЖАЛАРИ, ВАЗИФАЛАРИ ҲАҚИДА ФИКР ЮРИТМОҚДА.



Махсуд САДУЛЛАЕВ,
ЎзХДП Амударё туман
Кенгаши раиси:



Санобар ХОЖАМУРАТОВА,
Қорақалпоғистон Республикаси
Жуқорғи Кенгесидаги
ЎзХДП гуруҳи аъзоси:



Машъал ВАИСОВ,
ЎзХДП Ҳазорасп туман Кенгаши
раиси, туман Кенгашидаги
партия гуруҳи раҳбари:



Райхона КАРИМОВА,
Олий Мажлис Сенати
хузуридаги Ёшлар
парламенти аъзоси:

- Баҳорнинг бошланиши Қорақалпоғистон Республикасига қувончли хабарлар, муҳим янгиликлар билан келди. Давлатимиз раҳбари дастлаб Қорақалпоғистон Республикаси Амударё туманига бориб, янги кўприкнинг очилиш маросимида иштирок этди.

Ҳақиқатан ҳам, бу улкан иқтисодий ва ижтимоий аҳамиятга эга стратегик иншоотдир. Президентимиз 2020 йилда бу ташаббусни илгари сурган эди. Шу асосда юртимизнинг энг чекка ҳудудларидан бири бўлган Амударё туманида катта бунёдкорлик ишлари амалга оширилди, халқнинг узоғини яқин, оғирини енгил қилувчи кўприк қурилди. Бу ҳар бир қорақалпоғистонликнинг қалбига катта қувонч ва умид бағишлади.

Чунки йиллар давомида одамлар эски понтон кўприкдан фойдаланиб келган. Амударё устига қурилган бу кўприк 40 йилдан буюн аҳолига хизмат қилиб келмоқда. Лекин қишнинг қаҳратон совуқларида муз кўчиб, уни оқизиб кетар эди. Шунда манзилга бора олмай орқага қайтган кунларимиз кўп бўлган. Нуқус шахрига йиғилишга боришимиз учун Хоразм билан Беруний тумани ўртасидаги кўприкдан айланиб келишга мажбур бўлар эдик. Масофа узоқ, автомобилда бориш учун қўшимча 170-180 км жойини босиб ўтишга тўғри келган. Бу иш билан, даволаниш учун бораётган одамларнинг кўп вақтини оларди. Поездда эса кўшни Хоразм вилоятининг Ҳазорасп кўпригидан ўтиларди.

Энди солиштирайлик, кўприк орқали бир кеча-кундузда 12 минг автомобиль ҳаракатланар экан. Бу 48 минг йўловчининг 2 соат вақтини тежайди, дегани. Яна бир муҳим томони, аввалги ярқис эски кўприкдан аксарият кишилар қўриқиб ўтган бўлса, энди ҳеч нарсани ўйламасдан, дарёдан хавфсиз ўтилади.

Халқимиз неча йиллар орзу қилган кўприк ишга тушди. Бугун амударёликлар қувончининг чеки йўқ. Қайси даврага ўтирманг, ким билан суҳбатлашманг, шу ҳақида мамнуният билан, фахр билан гапирмоқда.

“Энди солиштирайлик, кўприк орқали бир кеча-кундузда 12 минг автомобиль ҳаракатланар экан. Бу 48 минг йўловчининг 2 соат вақтини тежайди, дегани. Яна бир муҳим томони, аввалги ярқис эски кўприкдан аксарият кишилар қўриқиб ўтган бўлса, энди ҳеч нарсани ўйламасдан, дарёдан хавфсиз ўтилади.”

Айниқса, Президентимиз “Бу йўл жаҳонга очилаётган Янги Ўзбекистон, Янги Қорақалпоғистоннинг тараққиёт ва фаровонлик йўллари” деганида кўп маъно бор.

Узоқ йиллар давомида шу кўприкдан Нукусга қатнаганман. Ўша пайтлари кўп ўйлардим, бу ҳудудларда ҳам инфратузилма ривожланар экани деб, чунки бирор иш билан кўчага чиқсак, узоқ йўлда кунимизнинг ярмини йўқотардик. Янги кўприк қурилишини орзу қилардик. Шуқри, ҳозир катта ўзгаришлар бўлаётганини ҳаммамиз кўриб, гувоҳи бўляпмиз. Энди узоғимиз яқин бўлди. Президентимизга минг-минг ташаккур айтамыз.

- Яратганга беҳисоб шуқри, Президентимизнинг Қорақалпоғистонга меҳри бошқача. Бир неча йилликда ортага суриб келинган муаммолар кейинги йилларда босқичма-босқич ечим топяпти, қорақалпоқ элига катта эътибор қаратиб келинмоқда.

Президентимизнинг Амударёга бу галги ташрифи ҳам қорақалпоғистонликлар ҳаётида ўчмас из қолдирди. Одамларимиз, қорақалпоқ эли бугун кўтаринчилик руҳида яшамоқда. Давлатимиз раҳбарининг Амударё туманида янги кўприкнинг очилиш маросимида иштирок этгани яна бир тарихий қадам, тарихий ютуқ бўлди, десак муболаға бўлмайди.

Ташрифдан ташрифгача ҳудудларда нималар ўзгарди, янгиланди, деган савол одамлар учун муҳим. Эсимда, Президентимиз бу ҳақдаги ташаббусни Хоразм вилояти фаоллари билан учрашувда илгари сурган эди. Ўшанда юрагимизга умид учқунлаб, қанчалар қувонгандик, “янги кўприк қуриларкан”, деб бир-биримизни табриклаган эдик, жуда кўпчилик шу кунни кутди.

“423 метрлик кўприк билан бирга Шовот-Қораўзак бекатларини боғлайдиган 85 километрлик темир йўл ҳамда 3 та вокзалнинг ҳам барпо этилиши қорақалпоқ элига ҳурмат ва эътиборнинг ёрқин намунаси, деб биламан.”

«Қачон замонавий кўприк қурилиб, биз ҳам дарё устидан хотиржам ўтарканмиз», деб орзу қилардик. Сайловчиларимиз бир неча марта шу масалада мурожаат билан чиққан. Бу йиллар давомида ечим топилмаётган катта муаммоларимиздан бири эди.

Мана, биз кутган кунлар ҳам етиб келди. Янги кўприк устидан ўтаётган поезд вагонларига қараб, ич-ичимдан хурсанд бўлдим. Президентимиз таъкидлаганидек, «Бу кўприк аввало ўзбек ва қорақалпоқ халқлари ўртасидаги мустақам ишонч ва дўстлик, оғзибирлик ва ҳамкорлик кўпригидир». Рост, Юртбошимизнинг шу сўзларини тинглаганимда, азалдан бир-бирига дўст, қардош сифатида яшаб келган халқларимиз ўртасидаги юксак ҳурмат, ишонч ва биродарликдан чексиз қувондим.

423 метрлик кўприк билан бирга Шовот-Қораўзак бекатларини боғлайдиган 85 километрлик темир йўл ҳамда 3 та вокзалнинг ҳам барпо этилиши қорақалпоқ элига ҳурмат ва эътиборнинг ёрқин намунаси, деб биламан.

Чиндан ҳам, яқин ўтмишга боқиб, ҳаётимиз қанчалар ўзгаргани, одамларнинг дунёқарашини ўсгани, ташаббуслари ҳам ортаганини кўриш мумкин. Бундан кўринадики, одамларда орзу қилишга, янги марраларни забт этишга имкон ҳам, иштиёқ ҳам етарли. Агар биз ғайрат қилсак, меҳнат қилсак, жон қуйдирсак, ҳаммасини қила оламиз.

- Давлатимиз раҳбари қайси вилоятга бормасин, ўзгаришлар, камчиликларни диққат билан кўздан кечирадди, одамларнинг фикри билан қизикади, доусини олади. Ҳудуддагиларнинг дилидагиларни билиб, келгуси вазибаларни белгилаб беради. Бу эса ўша ердаги иқтисодий тармоқларини кенгайтириш, аҳоли фаровонлигини ошириш ишларига янги рух, янги суръат бағишлади.

Фаоллар, халқ депутатлари маҳаллий Кенгашлар депутатлари, вазирлик ва идоралар раҳбарлари иштирокида ўтказилган йиғилишда вилоятимизни ҳар томонлама ривожлантириш билан боғлиқ бир қатор масалалар муҳокама этилди.

Худудни ривожлантириш бўйича лойиҳаларга 1,1 миллиард доллар ва 10 триллион сўм йўналтирилаётгани таъкидланди. Хоразмда кичик ва ўрта бизнесни янада қўллаб-қувватлаш учун имтиёзли шартларда 100 миллион доллар ажратилиши белгиланди. Бунинг ҳисобидан 5,5 минг тадбиркорга кўмак берилиб, 50 мингта доимий иш ўрни яратилади. Демак, минглаб оилалар даромад манбаига эга бўлади, иш бошлаш ниятида юрган қанчадан-қанча тадбиркорларимизга яқиндан кўмак берилади. Айниқса, туманимиз эркин иқтисодий зонасидан самарали фойдаланиб, sanoat лойиҳаларини жойлаштириш вазифаси қўйилгани тадбиркорларимизга катта имкониятлар яратиши аниқ.

Амударё устидан янги кўприк қурилиши Хоразм аҳли учун ҳам катта хурсандчилик бўлди. Янги иншоот орқали ҳар бир йўловчининг 2 соат вақти тежаллади, темир йўлда юк ташиш харажатлари 1 та вагон учун 600 минг сўмга арзонлашяпти. Табиий хом ашё захиралари кам бўлган Хоразм тадбиркорлари учун янги имкониятлар очилмоқда. Ҳудудимизда sanoat ва хизматлар ривожини, барқарор иш ўринлари кафолатлари мустақамланмоқда.

Хоразм тадбиркорлари учун қатор имтиёзлар белгиланди. Жумладан, импорт ускуналари, эҳтиёт қисм ва хом ашё 5 йилга божхона тўловидан озод қилинади, қўшилган қиймат солиғини 180 кунга кечиктириб тўлашга рухсат берилади.

Маҳаллийлаштириш лойиҳаларига олинган кредит фоизининг 10 фоиз банди қоплаб берилади, давлат мулки ва ер участкаларини хусусийлаштиришда 5 йил ичида бўлиб-бўлиб тўлаш имконияти яратилади. Сотилган кўчмас мулк учун тўлов 3 ойда амалга оширилганда 25 фоиз чегирма берилади. Иқтисодий ва sanoat зоналарида олган мажбуриятини бажарган тадбиркорлар ер ва бинони хусусийлаштириши мумкин бўлади. Экспортчиларга бошқа вилоятдан хом ашё етказиб бериш учун йўл харажатлари 50 фоизи Экспорт жамғармасидан қоплаб берилади.

Шунча имконият, енгиллик аҳолига барқарор даромад манбаини яратишга, иш ўринларининг доимийлиги ва кенгайишига асос бўлишидан қувондим.

Ҳазорасп туман Кенгаши депутати сифатида мени яна бир тақлиф ниҳоятда мамнун этди. Келгуси икки йилда вилоятда тупроқ йўллари умуман қолмаслиги кераклиги қайд этилди. Бу ободончилик, бунёдкорлик ишларининг кўлами янада кенгайди, қишлоқ ва шаҳарларимиз инфратузилмаси яхшиланди, дегани.

Сайловчилар билан учрашувларда айнан йўллари билан боғлиқ кўп мурожаатлар бўлади. Қишнинг қорли, қировли, ёмғирли кунларида ҳаракатланиш қийин бўлган тупроқли йўлларимиз бор, бу аҳолининг ҳақли эътирозларига сабаб бўлиб келаётган эди. Президентимизнинг топшириқлари ва тақлифлари муаммоларнинг ижобий ҳал бўлишига хизмат қилади.

- Бу галги ташрифда ҳам соҳаларни ривожлантиришга оид қатор тақлифлар билдирилиб, муаммолар ечими бўйича кўрсатма ва топшириқлар юклатилади. Одамлардан ис-тақлари, ишини ривожлантириш учун зарур масалалар ҳақида сўралади. Шунинг учун ҳар бир ҳудудда давлат раҳбари келишини жамоатчилик интиқлик билан кутади.

Хоразмга ташриф ҳар галгидан самарали ўтди, менимча. Айниқса, Урганч шаҳрида Хоразм вилоятини иқтисодий-ижтимоий ривожлантириш бўйича галдаги вазибалар муҳокамаси юзасидан ўтказилган йиғилишда ҳар бир масаланинг аниқ қўйилгани эътиборимни тортди.

Айниқса, Хоразмда Хитой тажрибаси асосида “уй sanoati” ривожлантирилиши кўпчилик қатори мени ҳам мамнун этди. Богот, Янгиарик, Янгибозор, Қўшқўпир ҳамда Урганч туманларида жун ва пиллани қайта ишлаш, Ҳазорасп, Хива, Тупроққалъа ва Хонқада гилам тўқиш жуда оммалашган. Бу йўналишлар қўллаб-қувватланиб, ипақчилик ва гиламчилик кооперациялари ташкил қилиниши, хонадонларда ихчам ускуналар ўрнатиш учун 100 миллион сўмгача гаровсиз кредит берилиши юзлаб, минглаб одамларимизни мамнун этди, руҳини кўтарди.

Гилам тўқиш қўлидан келадиган, шу ҳунарга қизикадиган, аммо қўлида етарли маблаг бўлмаган одамларимиз бор. Ушбу рағбат уларнинг иш бошлаши, ривожлантириши учун хизмат қилади. Асосийси, боқимандалик кайфиятини бартафоз этиш, ишсизларга имкон бериш, имкони борларни эса рағбатлантиришга эришилади. Банд одамнинг ҳаётида мазмун бўлади, ҳуқуқбузарлик ва турли ёмон ҳаёллар, ахборот хуружларига чалғимади.

“Хоразмга ташриф ҳар галгидан самарали ўтди, менимча. Айниқса, Урганч шаҳрида Хоразм вилоятини иқтисодий-ижтимоий ривожлантириш бўйича галдаги вазибалар муҳокамаси юзасидан ўтказилган йиғилишда ҳар бир масаланинг аниқ қўйилгани эътиборимни тортди.”

Оилавий тадбиркорлик дастури доирасида бу йил 5 мингта хонадонда интенсив усулда балиқ боқиш, 4 минг 400 та хонадонга тикувчилик, парранда, чорва, асалари ва боғдорчилик бўйича молиявий кўмак бериш вазифаси топширилди.

Албатта, ҳар бир оила ўзини эплаб кетишига эришиш осон бўлмайди. Бу жасоратли меҳнат талаб этади. Биз ҳар кунни шунга тайёр бўлишимиз керак. Партияимиз фаоллари, депутатлар вазибалар ижросини таъминлашга яқиндан туриб ёрдам бериши зарур, деб ўйлайман.

Умид қиламизки, яхши ният билан бошлаган ишларимиз хайрли бўлади, вазибалар сидқидилдан бажарилади. Мендаги ҳозирги хушайфият бутун хоразмликлар, бутун халқимизда бор, деб ишонаман. Чунки, ҳар бир ислохот, ҳар бир режа, айнан бизнинг, бизнинг ва халқимизнинг манфаати учун хизмат қилади.

“Ўзбекистон овози” муҳбири
Лазиза ШЕРОВА ёзиб олди.

Аёл – улуғ, аёл – мўътабар. Азалдан шундай бўлган, ҳозир ҳам шундай. У асло ожиза эмас. У ўқишни, қобилияти ва салоҳиятини кўрсатишни, шахс сифатида ҳурматга сазовор бўлишни истайди.



АЁЛ УЧУН ИМКОНИЯТ ЭШИКЛАРИ ОЧИҚ

Замон ўзгариб, юксалар экан, аёл ҳам юксалиб боради. Ўзбек ва ўзбекистонлик аёллар шахс сифатида ривожланиши жуда муҳим. Уларнинг уй хўжалиги бекаси, дала хизматчиси образи бутунлай ўзгариши керак. Аёл маънавияти, ижтимоий-иқтисодий, ҳуқуқий-сиёсий фаоллиги масаласи кун тартибига турибди.

Бугун мамлакатимиз бошқарув тизимида аёлларнинг улуши ошди. Кейинги йилларда бир ярим мингга яқин хотин-қиз турли даражадаги раҳбарлик лавозимида самарали фаолият кўрсатмоқда. Бу том маънода, хотин-қизларнинг ижодий иқтидори, касб маҳорати ва илмий салоҳияти эътиборга олинаётганидан далолатдир.

ЖИДДИЙ РАҚАМЛАР...

Маълумотларга кўра, хотин-қизларнинг раҳбар лавозимлардаги улуши 35 фоизга етди. 2022-2023 йилларда 398 минг нафар хотин-қизнинг бандлиги таъминланди, 100 минг нафари имтиёзли асосда олийгоҳларга қабул қилинди, 170 минг нафарига таҳсил олаётган олийгоҳларнинг шартнома тўловлари учун имтиёзли таълим кредитлари ажратилди, 14 минг нафари магистратурада бепул ўқитилмоқда, 198 минг нафари касбга ўқитилди. Аёллар тадбиркорлиги дастурлари доирасида ўтган йилда 225 мингдан зиёд лойиҳаларга 4,4 триллион сўмга яқин кредит, 40 мингга яқин хотин-қизларга жами 179,1 миллиард сўм субсидия ажратилди.

Ҳозирги вақтда юртимизда фидокорона меҳнат қилаётган хотин-қизларимизнинг улуши тиббиётда – 70 фоиздан ортиқ, таълим соҳасида – 74 фоизни ташкил қилаётган бўлса, иқтисодиёт ва саноат тармоқларида эса 40 фоиздан кўпдир.

Бугун аёллар орасида Сенат раиси бор, вазир бор, ҳоким бор, университет ректори бор, таниқли давлат ва жамоат арбоблари бор, Қаҳрамонлар, депутатлар бор, профессорлар, академиклар бор, хуллас, турли даражадаги раҳбарлар бор.

Ўзбекистон аёллари ҳар бир жабҳада ўз ўрнига эга бўлиб бораётганини барчамиз бевосита амалда кўриб, чуқур ҳис этяпмиз.

Мамлакатимизда хотин-қизлар масаласига катта эътибор қаратиляпти, уларнинг орзу-мақсадларини рўёбга чиқариш мақсадида кўп имтиёзлар берилмоқда. Хусусан, улар таълим олиш, тадбиркорликни йўлга қўйиш, тўловсиз магистратурада ўқиш, имтиёзли уй-жойлар олиш ва бошқа кенг имкониятларга эга.

ТАДБИРКОР АЁЛЛАР ҚўЛЛАБ-ҚўВВАТЛАНАДИ

Хотин-қизларни қўллаб-қувватлаш давлат мақсадли жамғармаси ҳисобидан уларга 3 йилгача ва 6 ойгача имтиёзли давр билан йиллик 14 фоиз ставкада 33 миллион сўмгача кредитлар берилди. Ушбу кредит маблағлари Тадбиркорликни ривожлантириш агентлиги, Бизнес ва тадбиркорлик олий мақтаби маъқуллаган дастурлар асосидаги ўқув курслари ёки «Ишга марҳамат» моно-марказлари, касб-хунарга ўқитиш марказлари, маҳаллалардаги касб-хунарга ўқитиш масканлари ва Хотин-қизлар тадбиркорлик марказлари ёки нодавлат таълим муассасаларининг касбга ўргатиш ўқув курсларининг махсус ўқитиш дастурларидан бирини муваффақиятли тугатган хотин-қизларга ажратилади.

ОТМГА КИРИШ УЧУН ТАВСИЯНОМА

Эҳтиёжманд оилалардаги хотин-қизларга олий таълим муассасаларига киришда давлат гранти асосидаги қабул доирасидаги танловда иштирок этиш учун тавсиянома берилди.

Тавсиянома куйидаги мезонлар асосида тақдим этилади:

- ✓ кам таъминланган оилалардаги хотин-қизлар;
- ✓ тўлиқсиз оилада тарбияланаётган, яъни отаси ёки онаси ёхуд уларнинг иккаласи ҳам вафот этган ижтимоий ҳимояга муҳтож қизлар;
- ✓ турмуш ўртоғи вафот этган, вояга етмаган фарзандни ёлғиз тарбиялаётган ижтимоий ҳимояга муҳтож аёллар;
- ✓ ногирон фарзанди бор эҳтиёжманд оилалардаги хотин-қизлар;
- ✓ 2 ва ундан ортиқ фарзандни тарбиялаётган, қариндошларидан алоҳида яшаётган ёлғиз аёлларнинг қиз фарзандлари;
- ✓ ота-оналаридан бири ёки ҳар иккиси ҳам I ёки II гуруҳ ногирони бўлган эҳтиёжманд оилалардаги хотин-қизлар.

Тавсиянома олиш учун туман (шаҳар) маҳалла ва оилани қўллаб-қувватлаш бўлимига электрон шаклда мурожаат қилинади.

КОНТРАКТ ТўЛОВЛАРИ ҚАЙТАРИШ ШАРТИСИЗ ҚўПЛАНАДИ

Ҳукуматнинг 447-сонли қарори билан қабул қилинган тегишли низомда ОТМ магистратурасида ўқиётган хотин-қизларнинг контракт тўловларини қўллаб бериш тартиби белгиланган.

ОТМ, шу жумладан, Давлат бошқарув академияси, Бош прокуратура академияси, Бизнес ва тадбиркорлик олий мақтаби ҳамда Банк-молия академиясининг магистратура босқичида ўқиётган барча хотин-қизларнинг контракт-тўловлари қайтариш шартисиз қўпланади.

Бунинг учун давлат ОТМнинг магистратура босқичига тўлов-контракт асосида қабул қилинган ва таълим олаётган талаба хотин-қизлар ўқув йили учун тўлов-контрактнинг тўлиқ суммасини қўллаб бериш юзасидан ўзлари ўқийдиган ОТМ ректори номига 15 сентябргача ариза билан мурожаат этади.

5 ЙИЛ ИШ СТАЖИГА ЭГА ХОТИН-ҚИЗЛАР УЧУН

Коллеж ёки техникум дипломидаги мутахассислиги бўйича 5 йил иш стажига эга хотин-қизлар контракт асосида ОТМга қабул қилинади. Бунда тавсияномага эга абитуриентлар орасида алоҳида тест ўтказилади, улар орасидан юқори балл тўплаган 500 нафаригина ОТМга кирилади.

7 ЙИЛГА ФОИЗСИЗ ТАЪЛИМ КРЕДИТИ

Президент қарорига кўра, олий ҳамда ўрта махсус ва профессионал таълимда таҳсил олувчи хотин-қизларга 7 йилга 14 фоизлик таълим кредитлари ажратилади. Бунда фоиз ставкаларини Молия вазирлигининг жамғармаси қўллаб беради. Хотин-қизлар эса асосий қарзни ўқишни тамомлагач, 7 йил давомида тўлайди.

ИШДАН БўШАТИШ МУМКИН ЭМАС...

Аёлларни пенсия ёшига тўлгани сабабли иш берувчи ташаббуси билан ишдан бўша-

тиш тақиқланади. Бунда аёлларнинг пенсия ёшига тўлгани ёки ёшга доир давлат пенсиясини олиш ҳуқуқи вужудга келгани сабабли номуайян муддатли меҳнат шартномасини 60 ёшга тўлгунга қадар ёки муддатли меҳнат шартномасининг муддати тугагунга қадар иш берувчининг ташаббусига кўра бекор қилиш мумкин эмас.

«АЁЛЛАР ДАФТАРИ» БИРИНЧИ ҚАДАМДИР

Ижтимоий ҳимояга муҳтож ишсиз хотин-қизлар, тадбиркорлик қилиш истагида бўлган эҳтиёжманд, боқувчиси бўлмаган, ижтимоий ёрдамга муҳтож I ва II гуруҳ ногиронлиги бўлган, тезкор тиббий муолажага муҳтож, уй-жойга муҳтож, қарамоғида ногиронлиги бўлган фарзандлари бор 30 ёшдан ошган эҳтиёжманд хотин-қизлар «Аёллар дафтари»га рўйхатга киритилади. Шу орқали улар қатор имконият ва қўллаб-қувватлашга эришади.

Хусусан, ёлғиз аёлларнинг фарзандлари боғчага имтиёзли рўйхат асосида қабул қилинади.

КАСБ ЎРГАНИШ УЧУН ДАВЛАТ ТўЛАЙДИ

Хотин-қизлар нодавлат таълим ташкилотларида касб-хунарга ва тадбиркорликка ўқиганда юзага келган харажатларнинг 70 фоизи, бироқ ҳар бир битирувчига 1 миллион сўмдан ортиқ бўлмаган харажатлар давлат томонидан қўллаб берилади.

ЧЕВАР АЁЛЛАР ҚўЛЛАБ-ҚўВВАТЛАНАДИ

Ишсиз хотин-қизлар замонавий миллий либосларни ишлаб чиқариш ва реализация қилиш мақсадида тадбиркорлик субъекти сифатида давлат рўйхатидан ўтгандан сўнг, бино ва иншоотнинг дастлабки 3 ойлик ижара тўлови 2024 йил 1 январдан БҲМнинг 10 бараваригача миқдорда Аҳолини тадбиркорликка жалб қилиш жамғармаси томонидан қўллаб берилади.

ИШЛАЙДИГАН ОНАЛАРГА ТАНАФФУС БЕРИЛАДИ

2 ёшга тўлмаган болали аёлларга болани овқатлантириш учун (ўзига берилган дам олиш ва овқатланиш учун бериладиган танаффусдан ташқари) камида ҳар 3 соатда бир марта ҳар бири 30 минутдан кам бўлмаган танаффус берилди.

2 ёшга тўлмаган икки ва ундан кўп болали аёлларга танаффуснинг муддати камида 1 соат қилиб белгиланади. Мазкур танаффуслар учун иш ҳақи камайтирилмайди.

Болали аёлнинг хоҳишига кўра, танаффуслар дам олиш ва овқатланиш учун белгиланган танаффусга қўшиб берилиши ёки умумлаштирилиб, иш кунининг бошига ёки охирига қўчирилиб, иш кунини шунга яраша қисқартирилиши мумкин.

ҚўШИМЧА ТАЪТИЛ ОЛИШ ҲУҚУҚИ

Қонунчилигимизга кўра, 12 ёшга тўлмаган икки ва ундан кўп боласи ёки 16 ёшга тўлмаган ногирон боласи бор аёлларга ҳар йили 3 иш кунидан кам бўлмаган ҳақ тўланадиган қўшимча таътил берилди. Шунингдек, уларнинг хоҳишига кўра, ҳар йили 14 календарь кундан кам бўлмаган иш ҳақи сақланмаган таътил берилди.

Бундай таътил йиллик таътилга қўшиб берилиши ёки алоҳида фойдаланилиши мумкин.

ДАСТАБКИ СИНОВ БЕЛГИЛАНМАЙДИ

Ҳомиладор аёллар, 3 ёшга тўлмаган боласи бор аёлларни ишга қабул қилишда дастлабки синов қўлланилмайди.

Шунингдек, 2 ёшга тўлмаган боласи бор аёллар аввалги ишини бажариши мумкин бўлмаганида боласи 2 ёшга тўлгунгача енгилроқ ёки ноқулай ишлаб чиқариш омилларининг таъсиридан холи ишга ўтказилади. Бунда аввалги ишидаги ўртача ойлик иш ҳақи сақлаб қолинади.

СУБСИДИЯ БЕРИЛАДИ

Президент қарори билан меҳнатга лаёқатли, ногиронлиги бўлган хотин-қизларни иш билан таъминлаган иш берувчилар учун 6 ой давомида ҳар ойда БҲМнинг 2 бараваридан кам бўлмаган миқдорда субсидия ажратилади.

53 ЁШДА ПЕНСИЯГА ЧИҚИШ МУМКИН

Технологиядаги, ишлаб чиқариш ва меҳнатни ташкил этишдаги ўзгаришлар, ҳодимлар сони (штати) ёки иш хусусиятининг ўзгаришига олиб келган ишлар ҳажмининг қисқаргани ёхуд корхонанинг тугатилгани муносабати билан ишдан озод этилган ва ишсиз деб эътироф этилган аёллар 53 ёшга тўлганда ва иш стажига камида 20 йил бўлганда пенсия олиш ҳуқуқи эга бўлади.

ЗўРАВОНЛИКДАН ЖАБР КўРГАНЛАР ДАВЛАТ ҲИМОЯСИДА

Зўравонликдан жабр кўрган хотин-қизлар Аёлларни реабилитация қилиш ва мослаштириш марказларига жойлаштирилади. Шунингдек, уларга ҳимоя ордерлари берилди ва аёлларнинг вояга етмаган фарзандларининг йўқотилган биометрик паспортлари тиклаб берилди. Таъйиқ ва зўравонликка учраган хотин-қизлар ариза билан судга мурожаат этганида давлат божи тўлашдан озод қилинган.

ХОТИН-ҚИЗЛАР ВА ЭРКАКЛАР ТЕНГ ҲУҚУҚЛИДИР

Давлат хизматидаги лавозимларни, шу жумладан, раҳбарлик лавозимларини эгаллаш учун танловда хотин-қизлар ва эркакларнинг тенг равишда иштирок этиши таъминланиши керак.

Давлат органларининг кадрлар хизматлари зиммасига танлов комиссияларига нафақат танловда иштирок этаётган шахсларнинг маълумоти ва касбий тайёргарлиги тўғрисидаги маълумотларни, балки давлат хизматининг тегишли лавозимларида ишлаган хотин-қизлар ва эркаклар сонининг нисбати тўғрисидаги маълумотларни ҳам тақдим этиш мажбурияти юклатилади.

Меҳри ва шижоати, тажриба ва тафаккури билан тараққиётга ҳисса қўшаётган опа-сингилларимиз кундан-кунга кўпаймоқда. Ғамхўрлик, шароит ва имтиёзлар опа-сингилларимизни янги марралар сари руҳлантирмоқда. Зотан, аёлларни эъзозлаган, хотин-қизлари ҳаётдан мамнун, бахтли яшаётган юрт ҳеч қачон кам бўлмайди.

Биз ҳам мамлакатимиздаги барча аёлларни байрам билан муборакбод этамиз! Янгиликлар яхшиликларга уланаверсин, ҳар бир аёл бахтли, саодатли яшасин. Бунга унинг тўла ҳаққи бор.

«Ўзбекистон овози» муҳбири
Лазиза ШЕРОВА тайёрлади.



БАҲОР, МЕҲР ВА ТАБИАТ ҲАҚИДА УЙЛАР



БАҲОР КЕЛДИ. БАҲОР БИЛАН БИРГА ҚАЛБЛАРДА МУДРАБ ЁТГАН ТУЙҒУЛАР ҲАМ УЙҒОНАДИ, КУРТАК ЁЗАДИ. ХУДДИ ЯҚИН ИНСОННИ КУТГАНДЕК, СОҒИНИБ, ИНТИҚ КУТИЛАДИ БУ ЙЁМ. КЕЧАГИНА ЁҚАН ҚОР ҲАМ КЎКЛАМ УСТИДАН ҒАЛАБА ҚОЗОНА ОЛМАДИ. БУ ФАҚАТГИНА ҚИШНИНГ СЎНГИ УРИНИШЛАРИ, ФЕВРАЛЬ ОЙИДАГИ ИСИБ КЕТГАН КУНЛАР УЧУН БАҲОРДАН ТОРТИБ ОЛГАН ҲИССАСИ, ҲАҚҚИ ЭДИ ГЎЁ.

ИККИ ФАСЛ БИР-БИРИ БИЛАН ҲИСОБ-КИТОБИНИ ЯКУНЛАГАН ОНДАН БОШЛАБ ЕРДАН ИЛИҚ ТАФТ КЕЛА БОШЛАДИ. ҚУШЛАР ҲАМ ҚАТОНЛАРИДА ЯШИЛ ОРЗУЛАРНИ ОЛИБ УЧАЁТГАНДЕК ГЎЁ. ДАРАХТЛАР УЙҒОНИШ ҚЎШИҒИНИ САССИЗ КУЙЛАСА, ТУПРОҚ ҚАЪРИДАГИ ТОМИРЛАР УЛАРНИ ЯНАДА БАЛАНДРОҚҚА КЎТАРИЛИШГА УНДАЙ, ХУДДИ БОРЛИҚ МУҲАББАТДАН ЖОНЛАНИШИГА ИШОРА ҚИЛГАНДЕК БЎЛАДИ. БИЗ СЕВГАН, БИЗГА ҚАДРДОН КЎКЛАМ ГЎЗАЛЛИКЛАРИ АВВАЛ ҚАЛБИМИЗНИ ҚУВОНАТИРАДИМИ ЁКИ КЎЗИМИЗНИ, ФАРҚИ ЙЎҚ. МУҲИМИ, У ЯНА КЕЛДИ, БАҲОР ЯНА ТАБИАТГА ҲУКМРОНЛИКНИ БОШЛАДИ.

БУНДАЙ ГЎЗАЛЛИКНИ КЎРИШ, ҲИС ЭТИШ УЧУН ҚАЛБ КЎЗИ УЙҒОҚ БЎЛИШИ КЕРАК. БУГҮН ОДАМЛАР КЎКЛАМНИ ҚАНДАЙ ҚАРШИ ОЛАДИ? ТАБИАТ ГЎЗАЛЛИКЛАРИ, МЎЪЖИЗАЛАРДАН ҚАЙ ДАРАЖАДА ТАЪСИРЛАНАДИ? МЕҲР-МУҲАББАТ, САДОҚАТ ВА ОҚИБАТ МЕЗОНЛАРИ ВА УЛАРНИ КУЗАТАЁТГАН НУРОНИЙЛАР БИЛАН СУҲБАТЛАШГИМИЗ КЕЛДИ.



НОТИҚЛАРНИНГ ШОҲИ БЎЛДИМ, КЎНГИЛЛАРНИНГ ГАДОСИ...

**Омонжон ота ҲОШИМОВ,
меҳнат фахрийси:**

— Болалагимда чўпон бўлишни орзу қилардим. Кўни-қўшни, маҳалла-кўйнинг кўй-молларини тўплаб, далада ўтлатиб келиш мен учун жуда ҳам завқли эди. Аммо қисмат мени нотик қилди. “Нотикларнинг шоҳи бўлдим, кўнгилларнинг гадоси. Бор бахтимни шундан топдим, шуда умрим маъноси”. Айни пайтда Ёлғиз тахаллуси билан “Хотира уйғонса гўзал” деган китобимни ёзаяпман. Чунки кечагина ҳамма таъзим қилиб ўтадиган одамларни, чинакам ҳазрати инсонларни бугун ҳеч ким танимаяпти. Шу сабабли унутилганларни эслатиб туриш, ўрнат олиш керак, деб ўйлайман.

Биласизми, ачам, баҳорни ким энг кўп кутади — деҳқонлар! Улар учун баҳор 20 февралдан бошланади. Айниқса, сабзовот етиштирувчилар учун қишда ҳам тиним йўқ. Бу йил баҳор дастлаб эрта келгандай бўлди. Кунлар ёруғ, илиқ бўлди. Карамлар экилди. Ана энди, уларни совуқ урмайдими, деб сўрарсиз. Йўқ, чунки маҳаллий карам навларимиз ана шундай 8 даража совуққа ҳам чидамли бўлади.

Мен лўли қавмига бригадир бўлганман. Карам эканимда бирдан қалин қор ёққан. Бу ҳолатдан қувонганлар ҳам бўлди. Лекин мен куймадим. Ўрганганларим асосида кўчатларни парваришладим, сувни тўхтатмасдан оқишида давом этдим. Қор тагидан яшил эмас, сап-сарик, олтин рангдаги кўчатлар кўринди.

Бугун ҳам орамизда бировнинг ташвишидан хурсанд бўладиган одамлар борми, дерсиз. Албатта, бор. Мени кечирасизку, озгина ношўкр бўлиб кетди, ачам. Одамлар меҳнатнинг қадрини, бир-бирининг қадрини унутиб қўйди. Ёши улғу одамларнинг маслаҳатини оғир оладиганлар ҳам бор, жоним қизим.

Мен қишлоқ советининг раиси бўлган пайтда, маҳалладаги кексалардан, нафақадаги нуронийлардан “академик деҳқонлар” гуруҳи тузганман. Кечирасизку, бир бурчакда унутилган одамлар чинакам гавҳар, аслида. Улар 50-60 йиллаб далада кетмон судраб, ер чопиб умр ўтказган. Кузги ер ҳайдашди, баҳорги ерни тайёрлашди, экишди. Режани ҳақиқий

ошириб бажарган. Чунки улар туПРОҚНИНГ таркибини, ҳолатини қўлга ушлаб туриб айтиб бера олиш қобилиятига эга. Ҳар бир соҳанинг ана шундай эгалари бор. Уларнинг мактаби, уларнинг ҳаёт тажрибаси ҳеч қайси китобда йўқ. Нуронийларимиз умри давомида амалда синаб кўрганларини ўргатади, улар ҳақиқий академиклар.

Биласизми, бугун одамларда нима етишмайди, шукроналик, сабр камайиб кетяпти. Кўпол ўхшатиш учун уэр сўрайман, лекин “туянинг юки энгил бўлса, ётоқ бўлади”, дейишади. Қанча энгиллик берилса, шунча дангасалашиб кетаётганлар оз эмас, афсуски. Ҳамма соҳанинг, ҳар бир ишнинг ўз эгаси бўлиши керак. Ҳамма зиммасидаги масъулиятни чин дилдан бажарса, муаммолар ҳам кўпаймайди. Атрофдаги муаммолардан нолийимиз, камчилик қидиришга, танқид қилишга устамиз. Лекин уларнинг ечими ҳақида сўралса, таклиф бера оладиган одамлар кам.

Келинг, бир-биримизни қадрлайлик. Атрофга бироз эътиборли бўлайлик. Бахтни узоқдан эмас, атрофимиздан қидирайлик. Ҳар тонг кўзимизни очиб, куёшнинг чиқишини кўриш, унинг тафтини ҳис этишининг ўзи бахт эмасми? Тирикликнинг ўзи бахт эмасми? Табиатнинг ҳар рангда жилоланиши, шилдираган сувнинг овози, қушларнинг сайрашу, болажонларнинг ҳайқирқларига тенг келадиغان қувонч, мўъжиза йўқ дунёда, аслида.



ҲАР БИР ИШГА МУНОСАБАТИМИЗ ЎЗИМИЗГА ҚАЙТАДИ

**Худойбергана АЛЛАБЕРГАНОВ,
меҳнат фахрийси:**

— Халқимиз қадрлаган удумларни минг йиллардан буюн ажодларимиз авлодларга етказиб келишган. Бугун кўпчилик у қадр эътибор қилмаган, балки унутгандир ҳам, қарашларга ишонардик, уларни қадрлардик. Бир вақтлар боболаримиз “ҳали шундай кунлар келади, ҳаммамиз бир бурчакка қараб ўтираемиз”, дер эди. Мана, бугун ўзимиз ҳам бобо бўлдик ва анча олдин айтилган гапларнинг ҳақиқатга айланганига гувоҳ бўлиб турибмиз. Яъни, бу телефон, интернет, телевизор каби воситалар боболаримиз айтган бурчак бўлди. Одамлар

бу нарсаларсиз ҳаётини тасаввур қила олмай қолди.

Замонавий техника ва технологиялар инсонларни бир-биридан, табиатдан, умуман, ҳақиқий ҳаётдан йироқлаштириб қўйди. Одамларда оқибат бироз чекинди.

Бизнинг ёшлигимизда тарбия ҳам, одамлар ўртасидаги муносабат ҳам бошқача эди. Баҳор келиши билан одамлар ҳам ҳаётга янгидан келгандек бўларди. Эслайман, отамиз ёнига чақириб, қўлимизга уруғ тутқазар ва уни ерга қадашни буюрарди. Уруғнинг унуб чиқиши, қандай кўкариши, ҳосил бериш-бермаслиги бизнинг ерга муносабитимиз, меҳримиз билан ўлчанишини айттарди. 5 ўғил ҳам айни ишни қилардик ва бевосита ерга алоқадорликни ўргатарди. Ерга меҳр берсак, табиатни севсак, чин дилдан меҳнат қилсак, табиат бизни рағбатлантиришига ишонардик.

Ҳар битта ишимизда, ҳар бир хатти-ҳаракатимизда вазминлик, қадриятлар таъсири сезилиб турарди. Чунки биз ҳар бир ишга муносабитимиз ўзимизга қайтишини англаб вояга етганмиз, шундай тарбия олганмиз.

Лекин жамиятшуносликда шундай қараш бор. Яъни, замон ривожланиши билан касблар бўлинади ёки мужассамлашади, дейилади. Демографик ўсиш, одамлар сонининг кўпайиши ховлиларни кўп қаватли уйларга айлантирди. Одамларда кўни-қўшничилик муносабати тобора камайиб, катта шаҳарларда йўқолиб ҳам борапти.

Бугунги табиатга муносабитимиз бир-биримизга қилинаётган муносабатнинг ойнаси, холос. Биз ёшлигимизда кенгашмасдан, маслаҳатлашмасдан бир кўчат ҳам экилмасди. Аёллар келишган ҳолда бир тандирда бир кунда кетма-кетликда нон ёпиб оларди. Чунки бир тандир нонга 2 боғ гўзалоя ишлатилса, кейингиларига унинг ярми, ҳаттоки ундан ҳам камроқ сарфланган. Бу нафақат иқтисод қилишга, балки нон ёпиш жараёнида бир-бирига кўмаклашиш, суҳбатлашиш, фикрлашиш ва шу орқали ўртадаги меҳрни, илиқликни мустаҳкамлашга эришилди эди.

Эркаклар бир иморатни кўтаришда ҳашар қилишарди. Ер чопиши, бирор бир маросим ўтказиши, ҳамма бамаслаҳат, ҳамжиҳатликда иш тутган. Бу эса одамларни бир-бирига яқинлаштирган, жипслаштирган. Биз шундай удумларимизни асраб қолишимиз керак.



СУВНИ ИСРОФ ҚИЛМАЙЛИК

**Баҳодир БОБОЖОН,
меҳнат фахрийси:**

— Охириги юз йилликларда табиатга инсонлар тарафидан жуда катта таъсирлар ўтказилди, ҳатто буни “табиатни ўзимизга бўйсундирамиз” қабилидаги шиорлар остида амалга оширдилар. Ваҳоланки, ўтган асрларда ашаган немис мутафаккирларидан Фридрих Энгельс: “Табиат устидан эришиладиган ғалабаларимиздан мағрурлики кетмаслигимиз керак. Бу ғалабаларнинг ҳар бири биринчи навбатда биз кутган натижаларни беради, аммо иккинчи ва учинчи навбатда, биринчи навбатдагиларнинг аҳамиятини ҳам йўққа чиқарадиган қутилма-

ган оқибатларни келтириб чиқариши мумкин”, деган экан.

Энди халқимизнинг ушбу мавзуга алоқадор урф-одатларига, аҳволига қайтайлик. Одамзотнинг яхши ҳаёт кечириши учун табиатдан кутган тўртта ҳолати бор. Булар: тоза ҳаво, тоза сув, яшиллик – ўрмон, тўқайлар ва шовқинсиз табиий товушлар. Одамзот тоза ҳаво истаб тоғларга, ўрмонларга, денгиз бўйларига чиқиб кетади. Кўпчилик хасталанганларга санаторийларга бориб дам олиш ва даволаниш тавсия этилади. Тошкент шаҳри ва баъзи бир катта шаҳарларимизда, ҳа айнан шаҳарларимизда, қишлоқларимизда эмас, ҳавонинг ифлослиги кетишига сабаб нима?.. Бу ҳақда ҳаммамиз чуқур ўйлашимиз керак.

Ҳалиям Президентимизнинг саъй-ҳаракатлари билан денгиз тубининг бир неча миллион гектар ерларига қумларда яхши ўсадиган яшилликлар экилди ва бу иш ҳар йили давом қилаяпти.

“Сув муқаддасдир”, “Сув ҳалолдир”, “Сувга тупурманг”, “Сувга ахлат ташламанг” каби талаблар ва тавсиялар гирдобиди улғайган авлодимиз. Биз ёш пайтларимизда, ариқлардан оққан, қудуқлардан челақлаб тортиб олинган сувларни бемалол ичардик. Ҳозирги вақтда баъзан учраб қоладиган ҳолатлар: чўмиладиган жойларда совун билан ювинишлар, сувнинг бўйида ўтириб олиб кир-чир ёки гиламларни ҳар хил кир ювиш воситалари билан ювишларни кўриб қийналиб кетамиз. Наҳотки, бу инсонлар юқорида биз келтирган гаплардан беҳабар бўлса, сувни исроф қилиш гуноҳ эканини билмасми?

Яқинда бир имом ўз маърузасида сувни исроф қилиш гуноҳлиги ҳақида гапириб, иссиқ сув келгунича оқиб турган совуқ сувни шунчаки оқизиб юбормасдан бир идишга олиб гулларни сугоришни маслаҳат берди. Бу ҳақда кўп гапирилади, аммо баъзи юртдошларимиз бу гапларни тингласа ҳам, эшитмайди шекилли.

Қолаверса, бурунги замонларда далага қувватли фақат чорванинг гўнги чиқариларди. Ҳозирги вақтда эса минг тонналаб фосфорли, азотли, калийли ва бошқа бирикмалардан иборат турли хил кимёвий ўғитлардан фойдаланилаёптики, охир-оқибат сизот сувлари билан бирга бу моддалар дарёлар, анҳорлар ва каналларга қуйилаёпти. Шунинг учун ҳам сувни ҳар қанча тозаланишига қарамасдан, водопровод сувининг таъми бемазалашиб борапти.

Шулар етмагандай сувни исроф қилиш давом этяпти. Уйларда ҳам, чойхоналарда ҳам совутиш мақсадида қовун-тарвуз ва меваларнинг устига соатлаб сув оқизиб қўйиш ҳоллари, афсуски, мавжуд. Икки челақ сув билан ювиш мумкин бўлган автомашинани тозалаш учун тонналаб сув сарфланыпти.

Эсимни таниган вақтлардан, тахминан 1980 йилларгача Амударёнинг Хоразм вилояти ҳудудларининг иккала қирғоғи ҳам қалин тўқайзор эди. Уларнинг ҳар тумандаги номлари ҳар хил бўлиб Қакрали тўқай, Тўпчи тўқай, Бодай тўқай ва бошқа номларда аталар эди. Тўқайлар, албатта, қалин дарахтзор эди. Шунинг учун ҳам воҳанинг ҳавосида кислород кўп бўлган. Уларда ҳар хил ёввойи ҳайвонлар шоқол, тулки, бўри, ёввойи тўнғуз ва ҳаттоки, Турон йўлбарси ҳам бўлган. Қўшларнинг турлари ҳақида айтмасам ҳам бўлади. Мана шу даврларда дарёда ва кўлларда балиқ кўп бўлган, ёввойи қушлар ов қилинган. Она табиат ўз меҳрини инсонлардан аямаган.

Табиатга нотўғри муносабат бизни эмас, келажак авлодни жуда қийин аҳволга солиб қўяди. Меҳримизни бир-биримиздан аямасликни табиатдан ўрганишимиз шарт. Бу бизнинг қонимизда бўлган. Фақатгина ким бўлганимизни, унутилиб кетаётган қадриятларимизни жонлантирайлик, хотирамизда қайта тиклайлик.

**Зилола УБАЙДУЛЛАЕВА
ёзиб олди.**

BRIFING

"БИЗНЕС ПОРТАЛ" ВА БАҲҚАРОР ИШ УРИНЛАРИ

"БИЗНЕСНИ РИВОЖЛАНТИРИШ БАНКИ" АТБ АХБОРОТ ХИЗМАТИ РАҲБАРИ ШУҲРАТ ОРИПОВ БРИФИНГДА "КИЧИК БИЗНЕСНИ УЗЛУКСИЗ ҚўЛЛАБ-ҚУВВАТЛАШ" КОМПЛЕКС ДАСТУРИ ДОИРАСИДА "БИЗНЕС ПОРТАЛ" ПЛАТФОРМАСИГА КЕЛИБ ТУШГАН АРИЗАЛАРНИНГ ҲОЛАТИ БЎЙИЧА МАЪЛУМОТ БЕРДИ.

– ПРЕЗИДЕНТИМИЗНИНГ 2023 йил 14 СЕНТЯБРДАГИ "КИЧИК БИЗНЕСНИ РИВОЖЛАНТИРИШНИ МОЛИЯВИЙ ВА ИНСТИТУЦИОНАЛ ҚўЛЛАБ-ҚУВВАТЛАШ ЧОРА-ТАДБИРЛАРИ ТЎҒРИСИДА"ГИ ҚАРОРИГА МУВОФИҚ, ҚАМЛАКАТИМИЗДА "КИЧИК БИЗНЕСНИ УЗЛУКСИЗ ҚўЛЛАБ-ҚУВВАТЛАШ" КОМПЛЕКС ДАСТУРИ АМАЛГА ОШИРИЛМОҚДА, – ДЕДИ У. – УШБУ ДАСТУРНИ САМАРАЛИ АМАЛГА ОШИРИШ ВА УНИ ДОИМИЙ РАВИШДА ТАКОМИЛЛАШТИРИБ БОРИШ БЎЙИЧА АСОСИЙ ТАЯНЧ "БИЗНЕСНИ РИВОЖЛАНТИРИШ БАНКИ" БЕЛГИЛАНГАН. ҲОЗИРДА ДАСТУР ДОИРАСИДА БАНК ТУЗИЛМАЛАРИ, БАНК ТОМОНИДАН ТАЪСИС ЭТИЛГАН КИЧИК БИЗНЕСНИ РИВОЖЛАНТИРИШ ЖАМҒАРМАСИ ВА 14 ТА КИЧИК БИЗНЕСГА ҚўМАКЛАШИШ ҲУДУДИЙ МАРКАЗЛАРИ ТОМОНИДАН ФАОЛ АМАЛИЙ ИШЛАР ОЛИБ БОРИЛМОҚДА.

Хусусан, дастур доирасида банк томонидан "Бизнес портал" ишга туширилди. Дастурда иштирок этиш истагида бўлганлар мазкур портал орқали онлайн ариза билан мурожаат қилишлари мумкин.

2024 йил 28 февраль ҳолатига кўра, "Бизнес портал"га келиб тушган аризалар сони 52 минг 91 тани ташкил этмоқда. Аризаларнинг умумий лойиҳа қиймати эса 5 триллион 16 миллиард 700 миллион сўмга тенг. Бугунги кунга қадар 21 минг 155 та, умумий қиймати 2 триллион 27 миллиард 800 миллион сўмлик лойиҳалар скоринг босқичида ижобий баҳоланди. Мазкур жараён инсон омили иштирокисиз амалга оширилмоқда.

Кейинги босқичда ўрганиш учун ҳоқим ёрданчиларига ўтказилган лойиҳалар сони 1 минг 856 тани ва уларнинг умумий қийма-

ти 169 миллиард 400 миллион сўмни ташкил этади.

Шу кунга қадар айна босқичдан жами қиймати 1 триллион 719 миллиард 500 миллион сўмлик 17 минг 856 та лойиҳа ижобий хулоса билан кейинги босқичга ўтказилди. Лойиҳаларни баҳолаш ва танлаш гуруҳи томонидан айна пайтда умумий қиймати 199 миллиард 600 миллион сўмлик 2 минг 144 та лойиҳа кўриб чиқилмоқда. Эътиборли жиҳати, ушбу гуруҳ томонидан бугунги кунга қадар 9 минг 504 та лойиҳага руҳсат берилган ва уларнинг умумий қиймати 935 миллиард 600 миллион сўмга тенг бўлган.

Мазкур босқичлардан ўтиб, ўқув жараёнига жалб қилинган тадбиркорлар сони 6 минг 83 нафарни ташкил этмоқда. Улар томонидан таклиф этилган лойиҳалар қиймати

эса 580 миллиард 800 миллион сўмни ташкил қилади. Энг муҳим босқич – сертификат олиш учун жами 3 421 та ташаббускор имтиҳон топширган бўлиб, улардан 2 минг 729 таси сертификатни қўлга киритган.

Шу пайтга қадар барча банклар томонидан 459 та лойиҳага кредит ажратиш ишлари тўлиқ якунига етказилди. Умумий ҳисобда 44 миллиард 200 миллион сўмлик кредит шартномалари тузилган ва улар доирасида тўлиқ ажратиб бўлинган кредит ҳажми 41 миллиард 300 миллион сўмни ташкил этмоқда.

Яна шуни алоҳида таъкидлаш лозимки, куйидагиларонлайн ариза юбориш орқали ушбу дастурида иштирок этиш ҳуқуқига эга бўлади. Жумладан, камида бир йил мобайнида фаолият юритаётган яққа тартибдаги тадбиркорлар, деҳқон хўжаликлари, ўзини ўзи банд қилган

шахслар, хунармандлар, касаначилар, нодавлат таълим ташкилотлари, уч ва ундан ортиқ кишини доимий иш билан таъминлаётган кичик тадбиркорлик субъектлари ҳамда оилавий тадбиркорлик дастурлари доирасида ўз бизнес лойиҳаларини муваффақиятли амалга ошириб, ижобий кредит тарихига эга бўлган юридик ва жисмоний шахслар.

"Кичик бизнесни узлуксиз қўллаб-қувватлаш" комплекс дастурини 2023-2026 йилларда амалга ошириш учун давлат маблағлари ҳисобидан 6 триллион сўм ва халқаро молия институтларининг 1,2 миллиард АҚШ доллари миқдоридagi маблағлари йўналтирилиши белгиланган.

Таштемир ХУДОЙҚУЛОВ,
"Ўзбекистон овози" муҳбири.



ТАМАКИ ТАЪСИРИ

Ўсмирлар организмда қайтариб бўлмас асоратлар қолдиради

Тамакининг инсон саломатлигига зарари хусусида кўп гапирилади. У тўла-тўқис шакланган организмга шунчалик салбий таъсир этадики, ҳали ривожланаётган ўсмирлар танаси ушбу зарарли одат сабабли ундан-да кўп азият чекади.

— Тамаки тутунида 7000 дан ортиқ кимёвий моддалар бўлиб, уларнинг аксарияти соғлиқ учун хавфли, — дейди Соғлиқни сақлаш вазирлигининг тамакига қарши курашиш бўйича бош консультанти Шухрат Шукуров. — Тамаки ва унинг тутуни ҳар қандай кўринишда инсоннинг барча органларига зарарли таъсир кўрсатади.

Унинг организмга хавфи таркибидаги кучли наркотик таъсирга эга бўлган ва ўзига қарамликни келтириб чиқарадиган никотин билан боғлиқ.

Айниқса, ўсмирларда никотинга жисмоний ва руҳий қарамлик жадал ривожланади. Унинг оз миқдори ҳам бўшаши ва яхши кайфият ҳиссини туғдиради, кўп миқдори эса юрак ва марказий асаб тизимига тез таъсир қилувчи захар ҳисобланади.

Тамаки маҳсулотлари таъми ширин қилувчи, хушбўй хид таратувчи консервантлар ва бошқа қўшимчалар қўшилган ҳолда тайёрланади ва бу маҳсулотнинг жозибadorли-

гини оширади.

Ўсмирлик — мия ривожланишида критик давр бўлиб, бу пайтда никотин ўқувчиларнинг, аввало, миясига зарарли таъсир кўрсатади.

Натижада хотира ва билим олиш қобилиятининг пасайишига, кучли қарамлик ва тахликали неврозларга олиб келади.

Тамаки чекувчи ўқувчиларда нафас йўллари ва қулоқ инфекциялари юкиш эҳтимоли ортади, уларда йўтал, бронхит, пневмония, астма ва нафас етишмовчилиги кузатилади.

Бундан ташқари, тамаки чекиш милк, суюқ тўқимаси, тиш боғламаларининг бузилишига, тишларнинг барвақт тўкилиши каби саратонолди ҳолатларга олиб келади. Кейинчалик эса чекувчиларда оғиз бўшлиғи, тил, лаб, милк, ҳиқилдоқ, қизилўнғач, ошқозон ва ошқозоноти беши саратони ривожланиш эҳтимоли кескин ошади.

Бундай ҳолат юртимизда тамаки чекишга қарши олиб борилаётган профилактик тадбирларни янада кучайтириш ва кескин чоралар кўришни тақозо этади.

Соғлиқни сақлаш вазирлиги
Матбуот хизмати.

Эълон

КОРХОНА ВА ТАШКИЛОТЛАР ДИҚҚАТИГА

Ўзбекистон Халқ демократик партияси Марказий Кенгаши куйидаги тарғибот воситаларини тайёрлаш ва чоп этиш заруратидан келиб чиқиб танлов эълон қилади:

- 20 минг дона А5 ҳажмдаги блокнот;
- 20 минг дона кўкрак нишони (значок);
- 20 минг дона кепка;
- 10 минг дона қоғоз пакет;

- 20 минг дона ручка;
- 5 минг дона А4 фолдер;
- 10 минг дона пластик пакет;
- 10 минг дона 10*15 см ҳажмдаги байроқ;
- 1 минг дона 30*40 см ҳажмдаги байроқ;
- 1 минг дона 100*150 см ҳажмдаги байроқ

Тижорат таклифлари куйидаги манзил бўйича қабул қилинади:

100029, Тошкент шаҳри, Мустақиллик майдони 5-уй, 3-бино.

Изоҳ: Танлов савдоларида иштирок этишни истаган ташкилотлар тарғибот воситаларининг техник таснифлари бўйича (71) 239-19-73 телефон рақами орқали маълумот олишлари мумкин.



ОНА ҲАЁТ ЙЎЛИДАГИ БИРИНЧИ УСТОЗДИР!

Юртимизга ҳар йили баҳор фаслининг илк даракчиси каби кириб келадиган 8 март - Халқаро хотин-қизлар байрамини ўзгача гўзаллик ва бетакрор нафосат айёми сифатида нишонлаймиз. Бу байрамнинг айнан баҳор фаслида нишонланишида ўзига хос рамзий маъно бор, аслида. Чунки ўзининг гўзаллиги, меҳри, илиқ тафти, саховати билан аёл зоти баҳорга жуда-жуда ўхшаб кетади.

Кеча Юқори Чирчиқ тумани 20-умумий ўрта таълим мактабида 8 март - Халқаро хотин-қизлар куни муносабати билан бошланғич синф ўқитувчиси Дилнора Саидназарова ўтказган «Аёлни асрагил элим» мавзусидаги очик тарбиявий соатда оналарга, аёлларга ҳурмат-эҳтиром кўрсатиш, уларни эъозлаш ҳақида илиқ фикрлар айтилди.

Дастлаб мактаб директори Дилдора Ортиқова сўз олиб, жамоада ишлаётган хотин-қизларни, мактабдаги ўқувчи қизларни байрам билан муборакбод этди. Педагогларнинг таълимида, илм-фанда эришаётган ютуқлари, самарали меҳнатларини эътироф этиб, миннатдорчилик билдирди.

Мактабнинг 3-“D” синф ўқувчилари

томонидан муқаддас аёлларга, гўзал ва латофатли қизларга, меҳрибон оналарга бағишлаб айтилган шеърлар барчага хуш ва байрамона кайфият улашди.

- Аёлга кўп таърифлар берамиз.

Аввало, аёл она сифатида юксак кадр-қимматга, ҳурмат ва эъозга лойиқ, - дейди бошланғич синф ўқитувчиси Дилнора Саидназарова.

– Чунки она ўз зурриёдининг илк устозидир. У фарзандининг тарбиячиси, ҳаётнинг зарур кўникмаларидан сабоқ берадиган, дунёни энди англаётган гўдакни тўғри йўлга бошлайдиган биринчи ўқитувчидир. Ўсиб келаётган ёш авлодни она алласи эзгуликка ўргатади, парвариш қилади, Ватанга, халққа садоқат руҳида тарбиялайди. Шу маънода бундай буюк инсонни, меҳри ва тафти иссиқ илк устозни қадрлаш, эъозлаш ҳаммамизнинг бурчимиздир. Бугунги дарсимиздаги очик тарбиявий соат онага, аёлга бўлган ҳурмат-эҳтиромни ўқувчи-ёшлар ўртасида тарғиб қилиш мақсадида ташкил этилди.

Тарбиявий соат дарси ўқувчиларда бир олам таассурот қолдирди.

Ўз муҳбиримиз.

ЯНГИ ЎЗБЕКИСТОН АЁЛИ

ИЛМЛИ ВА МАЪНАВИЯТЛИ БЎЛМОҒИ ШАРТ!



Хотин-қизларнинг билим олиши, ўз устида ишлаши, ривожланиши оила ва жамиятнинг ютуғидир.

Шу маънода мамлакатимизда сўнгги йилларда хотин-қизларни ҳар томонлама қўллаб-қувватлаш, фаоллигини ошириш, уларнинг фаровон турмуш кечириши учун зарур шарт-шароитларни яратиш, шу орқали ҳаётдан рози бўлиб яшашларига эришиш учун кенг кўламли ишлар амалга оширилмоқда. Президентимиз аёлларнинг жамиятдаги ўрни ва ролига юқори баҳо бериб, уларнинг ҳуқуқ ва манфаатларини ҳимоя қилиш, таълим олишига шарт-шароитлар яратиш, ижтимоий муаммоларини ҳал этишга кўмаклашишга алоҳида эътибор қаратиб келмоқда.

Биргина олий таълим тизимини оладиган бўлсак, бунда хотин-қизлар учун яратилаётган имкониятлар дунёдаги қанча аёлларнинг ҳавасини келтириши аниқ. Янги Ўзбекистонда хотин-қизлар чин маънода эъзоз ва қадр топмоқда, ижобий натижалар халқаро миқёсда эътироф этилмоқда.

Бизнинг Наманган давлат университети фаолиятида ҳам хотин-қизларнинг ўрни бениҳоят катта. Жамоада фаолият олиб бораётган 680 нафар профессор-ўқитувчиларимизнинг 285 нафари, яъни қарийб 41,9 фоизини хотин-қизлар ташкил этади. Улар орасида 6 нафар фан докторлари, профессорлар, 54 нафар фан номзодлари, шу жумладан, PhD, доцент аёлларнинг борлиги университет илмий салоҳиятини белгилашда алоҳида ўрин тутди.

Қувонарлиси, университет илмий салоҳияти йил сайин юксалиб бормоқда. Бу сўзимизнинг исботини кейинги уч йилда 141 та илмий ишлар ҳимоя қилинган бўлса, бунинг 57,3 фоизи олимпиа хотин-қизларимиз ҳиссасига тўғри келганида кўриш мумкин. Жорий ўқув йилида эса бу кўрсаткич янада ортади, негаки, бу йилда университетдаги мавжуд 5 та илмий даража берувчи Илмий кенгашларда хотин-қизларимиз томонидан 86 та илмий ишлар ҳимоя қилиниши кутилмоқда. Натижада жамоага яна шунча фалсафа фанлари доктори, PhD ҳамда фан доктори, DSc илмий даражасига эга олимпиа аёллар кўшилади.

Илмий соҳа кўрсаткичлари ҳақида сўз кетганда шунинг ҳам таъкидлаб ўтишим лозимки, университетда айтилганда 315

нафар хотин-қизлар докторантурада тахсил олмоқда. Мустақил изланувчи сифатида фаолият олиб бораётган аёллар эса 80 нафар. Сўнгги уч йил давомида ишга қабул қилинган ёш мутахассис (магистр)лар 157 нафарни ташкил этган бўлса, биргина 2023 йилда 29 нафар хотин-қизлар мутахассис сифатида ишга қабул қилинди. Айтилганда 35 ёшгача бўлган 265 нафар профессор-ўқитувчиларнинг 34,7 фоизини хотин-қизлар ташкил этмоқда.

Бир сўз билан айтганда, университети-мизнинг мавжуд 16 та факультети, 41 та кафедрасининг самарали фаолиятида педагог хотин-қизларимизнинг ўрни ва ҳиссаси салмоқли.

Дарҳақиқат, мамлакатимизда хотин-қизларни ижтимоий қўллаб-қувватлаш бўйича тизимли ишлар амалга оширилмоқда. Жумладан, 2020 йилдан ижтимоий ҳимояга муҳтож оила қизларига олий таълимга ўқишга кириш учун 4 фоиз квота жорий этилди. 2022/2023 ўқув йилидан эса олий таълим муассасалари, техникум ва коллежларда ўқиётган хотин-қизларнинг таълим контрактини тўлаш учун фоизсиз таълим кредитлари бериш бошланди. Магистратура босқичида ўқиётган барча хотин-қизлар шартнома тўловларини давлат томонидан қоплаш тартиби белгиланди. Эҳтиёжманд оила вакиллари, етим ёки ота-онасининг қарамоғидан маҳрум бўлган талаба қизларнинг таълим шартномаларини

» **Яратилаётган имкониятлар ёшлар салоҳиятини том маънода рўёбга чиқармоқда. Университетимизда 1189 нафар иқтидорли талаба бўлса, уларнинг 723 нафари қизлар. Шунингдек, 118 нафар талаба-қизларимиз турли спорт мусобақаларининг ғолиб ва совриндорлари ҳисобланади. 10 нафар қизларимизнинг давлат стипендиантлари экани ҳам қалбимизга доим ғурур бағишлайди.**

маҳаллий бюджетнинг кўшимча манбалари ҳисобидан қайтариш шартсиз қоплаш тартиби жорий қилинди.

Шунингдек, мамнуният билан эътироф этиш ўрниликки, мамлакатимизда мутахассислиги бўйича камида 5 йил меҳнат стажига эга, лекин олий маълумотга эга бўлмаган 500 нафар хотин-қизларни ҳар йили тегишли тартибга кўра, давлат олий таълим муассасаларининг бакалаврият таълим йўналишларига умумий қабул параметрларидан ташқари алоҳида тест синовлари натижаларига мувофиқ тўлов-контракт асосида ўқишга қабул қилиш амалиёти жорий этилди. Давлат илмий ташкилотлари

ёки олий таълим муассасалари докторантура-сига хотин-қизлар учун республика миқёсида ҳар йили камида 300 тадан мақсадли квота ажратиб борилмоқда.

Бу борада Наманган давлат университетида ҳам аниқ чора-тадбирлар асосида иш олиб борилмоқда. Университетда жорий ўқув йилида 71 та таълим йўналишларидаги 953 та академик гуруҳларда 24082 нафар талаба тахсил олаётган бўлса, уларнинг 15520 нафари қизлардир. Талаба-қизларни бакалавриятнинг кундузги, сиртки, кечки таълим ҳамда магистратура ва кўшма таълим гуруҳларида чуқур билим олиши, етук мутахассис бўлиб шаклланишлари учун барча шароитлар яратилган, улар барча имтиёз ва имкониятлардан тўлақонли фойдаланмоқдалар. Айтилганда 27 та магистратура мутахассисликларида 207 нафар қизлар тахсил олишяпти. Уларнинг шартнома тўловлари давлат томонидан қоплаб берилаяпти.

Хусусан, 95 нафар ногиронлиги бўлган, 32 нафар чин етим ва "Меҳрибонлик уйи" тарбияланувчилари бўлган, 275 нафар боқувчисини йўқотган ҳамда 12 нафар хорижлик талаба-қизлар ҳар жиҳатдан ижтимоий қўллаб-қувватлаб келинмоқда. Уларнинг тенгдошлари билан баб-баробар ижтимоий фаол бўлиши, турли кўрик-танлов ва мусобақаларда иштирок этиши, турар жой билан таъминланиши учун тегишли чоралар кўриб келинмоқда.

Қолаверса, 5 нафар "Темир дафтар", 34 нафар "Аёллар дафтари", 60 нафар "Ёшлар дафтари"га киритилган ва 72 нафар ижтимоий ҳимоя реестрида турувчи талабалар белгиланган мезонлар асосида қўллаб-қувватланмоқда.

Яратилаётган имкониятлар ёшлар салоҳиятини том маънода рўёбга чиқармоқда. Университетимизда 1189 нафар иқтидорли талаба бўлса, уларнинг 723 нафари қизлар. Шунингдек, 118 нафар талаба-қизларимиз турли спорт мусобақаларининг ғолиб ва совриндорлари ҳисобланади. 10 нафар қизларимизнинг давлат стипендиантлари экани ҳам қалбимизга доим ғурур бағишлайди.

Маърифатпарвар бобомиз Абдулла Авлонийнинг: "Қизлар ҳаммадан кўра билим олишга интилиши керак, чунки бу билим билан келажак авлодни тарбиялайди" деган сўзлари бугун ҳам ўз қийматини йўқотгани йўқ.

Собитхон ТУРҒУНОВ,
Наманган давлат университети
ректору, педагогика фанлари
доктори, профессор.

ЎЗБЕКИСТОН

ЎЗБЕКИСТОН

ҲАР БИР ИНСОН ТАҚДИРИГА АЛОҲИДА ЁНДАШИШ ЛОЗИМ



Президент Шавкат Мирзиёев раислигида жорий йил 20 февраль кuni ижтимоий ҳимоя соҳасидаги устувор вазифалар муҳофазатига юзасидан видеоселектор йиғилишида ногиронлиги борларни тиббий ва ижтимоий реабилитация қилиш, ижтимоий ёрдамнинг манзиллиги ва натижадорлигини таъминлаш зарурлиги алоҳида таъкидланди.

Инсон ва унинг манфаатлари устувор саналган юртимизда амалга оширилаётган ижтимоий сиёсат замирида халқимиз турмуш фаровонлигини янада юксалтириш, айниқса эҳтиёжманд фуқароларни ҳар томонлама қўллаб-қувватлашдек олийжаноб мақсадлар муҳасам. Бу муҳим масалалар "Ўзбекистон-2030" стратегиясида ҳам ўзифодасини топган.

Бугунги кунда мамлакатимизда ижтимоий аҳамиятга эга лойиҳалар аҳолини ижтимоий ҳимоя қилиш, қўллаб-қувватлаш, бандликни таъминлаш, атроф-муҳитни, одамлар соғлигини муҳофаза этиш, соғлом турмуш тарзини қарор топтириш каби соҳаларда амалга оширилмоқда.

Ўзбекистон Меҳр-шафқат ва саломатлик жамоат фонди 2023 йил давомида ижтимоий аҳамиятга эга лойиҳаларни ишлаб чиқиш ва амалга оширишда ўзининг ижтимоий ҳамкори сифатида Ўзбекистон Республикаси Соғлиқни сақлаш вазирлиги, Ўзбекистон Республикаси Олий Мажлиси ҳузуридаги Нодавлат-нотижорат ташкилотлари ва фуқаролик жамиятининг бошқа институтларини

қўллаб-қувватлаш жамоат фонди ва бошқа бир қанча давлат, жамоат ташкилотлари билан яқиндан ҳамкорлик қилиб келди.

Жамоат фонди ўтган йил давомида ижтимоий ҳимояга муҳтож аҳоли қатламларини ҳар томонлама қўллаб-қувватлаш, малакали шифокорлар маслаҳати ва даволаш ишларини уюштириш мақсадида бир қанча хайрия тадбирлари ва лойиҳаларни амалга оширди.

Жумладан, кам таъминланган, меҳнатга лаёқати чекланган фуқароларни қўллаб-қувватлаш, даволаш ишларини уюштириш мақсадида республикамизнинг ихтисослаштирилган Хирургия, Кардиология, Урология, Нейрохирургия, Травматология ва ортопедия, Онкология, Эндокринология, Кўз микрохирургия илмий-амалий тиббиёт марказларида, Россия Федерацияси, Ҳиндистон, Жанубий Корея давлатларининг тиббиёт даволаш муассасида беморларнинг жарроҳлик амалиёти ва диагностика даволашлари ҳамда зарур тиббий жиҳозлар учун, ёшлари улғайган, якка-ёлғиз, қаровчиси ва боқувчиси бўлмаган оилаларни моддий ва маънавий жиҳатдан қўллаб-қувватлаш, аҳолига кўрсатилаётган ижтимоий ёрдамга ҳисса қўшиш мақсадида дори-дармон воситалари, зарур буюмлар билан таъминлаш, моддий ёрдамларни ташкил этиш ва йўл харажатларига, бахтсиз ҳодисалардан азият чеккан, уй-жойи ярқосиз ҳолга келиб қолган шахсларга уй-жойини таъмирлашда, жа-

моат фондининг вилоят, туман ҳудудий муассасалари фаолияти ва хайрия-эҳсон тадбирларини қўллаб-қувватлашга, "Жамиятда соғлом турмуш тарзини ва ижтимоий туризмни тарғиб этиш, аҳоли турмуш сифатини оширишга кўмаклашиш" мавзусидаги ижтимоий лойиҳа доирасида ворқаут майдончалари ташкил этиш орқали маҳалла ва кўча спортини ривожлантиришга 2 361 846 349.00 сўм сарф этди. Утган йил давомида жамоат фондига мурожаат этган фуқаролар, тиббиёт муассасалари, маҳалла кўмиталаридан келган ариза-муурожаатлар 77 та бўлиб, уларнинг асосий мазмуни ижтимоий ёрдамга муҳтож кишиларни протез-ортопедия буюмлари, техник воситалар, дори-дармонлар билан таъминлашда, малакали шифокорлар маслаҳати ва даволаш масканларига жойлаштиришда ҳомийлик ёрдами кўрсатишдан иборат бўлди. Барча ариза-муурожаатлар белгиланган муддатларда кўриб чиқилиб, ижобий ҳал этилди.

Умуман олганда, қайт этилган чора-тадбирлар Меҳр-шафқат ва саломатлик жамоат фондининг 2023 йил Давлат дастури ижросини таъминлаш, аҳолини ижтимоий муҳофаза қилиш борасида олиб борган ишлари кўламини яққол кўрсатиб турибди.

Ҳисобот даври якунига кўра, жамоат фондининг жами харажатлари 3 335 821 930.03 сўмни, хайрия-эҳсон, ҳомийлик харажатлари 2 361 846 349.00 сўмни ташкил этди.

Фонд бошқаруви томонидан 2024 йилда:

- ёлғиз ва ижтимоий мададга муҳтож кекса ва ногиронларни қўллаб-қувватлаш ва маънавий ёрдам кўрсатиш;

- ижтимоий ҳимояга муҳтож ёлғиз қариялар, иккинчи жаҳон уруши ва меҳнат фахрийлари ва ногиронларни соғломлаштириш ва ижтимоий хизмат кўрсатиш;

- оммавий ахборот воситаларида кексаларга зарур даражада эътибор бериш, уларни ҳар томонлама қўллаб-қувватлаш, уларнинг оилада ва жамиятдаги ўрни ҳақида телекўрсатувларни тайёрлашда фонд ваколатхона ва ҳудудий муассасаларининг бутун куч ва имкониятларини жалб қилишимиз, барча тадбирларни юқори савияда ўтказиш учун бор тажрибамизни ишга солишимиз, нодавлат жамоат ташкилотлари билан бу борада яқиндан ҳамкорлик қилишимиз, ўтган йили йўл қўйилган камчиликлардан тегишли хулоса чиқаришимиз ва зиммамиздаги масъулиятни чуқур ҳис этган ҳолда ишни ташкил этишимиз талаб этилади.

Жорий йилда ҳам фонд томонидан фуқаролар соғлигини муҳофаза қилиш, касалликка чалинган беморларнинг даволанишлари ҳамда боқувчисини йўқотган ижтимоий ҳимояга муҳтож оилалар фарзандларига ёрдам кўрсатиш борасидаги фаолият самарали давом эттирилади.

Мухтор УСМОНХЎЖАЕВ





**TURON
BANK**



23,5%
MILLIY VALYUTADA

Smart MUNOSABATI BILAN
MAKSIMUM OMONATI
YUQORI FOIZLARDA



1220
turonbank.uz

"MyTuron" mobil
ilovasini yuklab oling



"Ўзсувтаъминот"
акциядорлик
жамияти жамоаси
юртимиздаги
барча аёлларни,
шу жумладан, соҳа
тизимда меҳнат
қилиб келаётган
дилбар
опа-сингилларимиз,
лобар ва гўзал
қизларимизни
8 март – Халқаро
хотин-қизлар куни
билан самимий
муборакбод этади!
Сиз, азизларни
кўклам нафаси
уфуриб турган
баҳорий қувонч
йил бўйи асло
тарк этмасин!



O'ZSUVTA'MINOT
AKSIYADORLIK JAMIYATI

MUASSIS:



O'ZBEKISTON
XALQ DEMOKRATIK
PARTIYASI
MARKAZIY KENGASHI

O'zbekiston ovozi

TAHRIR HAY'ATI:

Ulug'bek INOYATOV Muslihiiddin MUHIDDINOV
Ulug'bek VAFOYEV Hayotxon ORTIQBOYEVA
Maqsuda VORISOVA Shuhrat ISLOMOV
Qalandar ABDURAHMONOV Toshtemir XUDOYQULOV
Guliston ANNAQILICHEVA

Bosh muharrir: To'liqin TO'RAXONOV

MANZILIMIZ: 100135, Toshkent, Bunyodkor shoh ko'chasi, 50 «A»-uy.

Telefonlar: (71) 239-12-14

Reklama b'ulimi: (91) 190-19-49. E-mail: uzbovozi@mail.ru

«Sharq» nashriyot-matbaa aksiyadorlik kompaniyasi
bosmaxonasida chop etildi.
Korxonaning manzili: Buyuk Turon ko'chasi, 41-uy.
Gazeta ofset usulida, A-2 formatida bosildi. Hajmi — 4 bosma taboq.

Gazeta O'zbekiston Matbuot va axborot agentligida
0006-raqam bilan 2007-yil 11-yanvarda ro'yxatga olingan.

Navbatchi: **Ravshan SHODIYEV**
Sahifalovchi: **Bahrom NORMURODOV**

Г — 337. 3557 nusxada bosildi.

Nashr ko'rsatkichi — 220.

t — Tijorat materiallari

O'za yakuni —
Topshirilgan vaqti — 22:30

1 2 3 4 5 6

Sotuvda kelishilgan narxda

Gazeta haftaning chorshanba kuni chiqadi. «O'zbekiston ovozi» materiallarini ko'chirib bosish faqat tahririyat ruxsati bilan amalga oshiriladi.